

## Èkwo-ozì, Pòlù Deru Nù Ndu Romu

<sup>1</sup> Èkwo-ozì ọwa-a shì l'ẹka mụbe Pòlù; onye ejeru Jizọsu Kéreshi ozi; bụru onye Chileke kuru gẹ mu bụru onye-ishi-ozì ono; bya aburu onye Chileke ọtaru gẹ mu bya ezia ozi-ọma iya ono.

<sup>2</sup> Ozi-ọma ono bụ iphe, Chileke shihawaa l'ọnu ndu mpfuchiru nkiya kwehawaa ukwe iya teke dūhakpowaro ẹnya ẹnya; tẹme a byakwaphọ edehawa iya l'ẹkwo-opfu Chileke. <sup>3</sup> Ozi-ọma ono bụ kẹ Nwa iya, bụ iya bụ Nnajiuphu anyi Jizọsu Kéreshi. A -bya l'abubu, ọ bụ nemadzụ bụ l'a nwuru iya ọ bụru Nwa Dévidi. <sup>4</sup> Chileke shì l'ike ono, meru iya ọ bụru onye dū nsọ ono; mee ya o shì l'ọnwu teta dzuru ndzụ egoshi l'ọ bụ Nwa iya. <sup>5</sup> Ọ bụ iya bẹ Chileke gbẹ l'ẹka iya meeru mu eze-iphe-ọma ono, bụ kẹ gẹ mu bụru onye-ishi-ozì duru ọha, shikpọọ ẹkameka lẹ mgboko mgburugburu duba l'uzo, ẹphe e-shi kweta; meje iphe, e deru l'ẹkwo-opfu Chileke g'eeshi nno kutsee ẹpha Kéreshi ono. <sup>6</sup> Gẹ mu edu ndiphe l'ophu ono bẹ unubẹ ndu Romu yichakwaa ya; mbụ unubẹ ndu Chileke kuru g'unu bụru kẹ Jizọsu Kéreshi.

<sup>7</sup> Ọo ya bụ lẹ mu ede ẹkwo-a anụ unu g'unu hakọta lẹ Romu; mbụ unubẹ ndu Chileke yeru obu bya ekua unu; g'unu bụru ndu-nsọ. Gẹ Chileke, bụ Nna anyi yẹ Nnajiuphu ono, bụ Jizọsu Kéreshi meeru unu eze-iphe-ọma; mek-waaphọ g'ẹhu dū unu guu.

### *Pọlu epfu k'eye Romu*

<sup>8</sup> Iphe mbụ kpọada bụ ọ mu gbẹ Jizọsu Kéreshi l'ẹka ekeleru unu Chileke g'unu ha; kele e pfudzuwaru k'ekwekwe, unu kweru ke Chileke l'eliphe mgburugburu. <sup>9</sup> L'ọ kwa Chileke bụ onye ekebe mu l'anọduje epfuru iya opfu ẹhu unu eswe l'enyashi mę mu -nọdu epfu anụ iya. Ọo Chileke ono bę mu gude obu mu g'ọ ha ejeru ozi k'ezi ozi-ọma ke Nwa iya ono, bụ Jizọsu. <sup>10</sup> Mu anọduje epfu anụ iya sụ g'o gude obu ọmaa ya mee gę mu kabę kpata ọzo bya agbaphee unu. <sup>11</sup> L'ọogukpo mu agụgu gę mu l'unu hụma; k'ọphu mu e-me g'iphe-ọma, shi Unme-dụ-Nsọ l'ẹka rwube unu ẹka. L'eshi ẹgube ono mee g'obu shihu unu ike. <sup>12</sup> Mbụ ọ-a; iphe, mu epfu bụ l'ekweta, unu kwetarụ e-me g'obu shihu mu ike; ekweta nkemu emekwaaphọ g'obu shihu unu ike. Ọo ya bụ; anyi eshi nno yeru nwibe anyi ẹka.

<sup>13</sup> Iphe, unu a-maru; unwunna mu; bụ ọ tekeneteke bę mu asuje ọ mu abyawaa unu agbaphe; ọle eshikpọo teke ono bya asụ nta-a bę o nweerupho iphe, akpọshije mu abyabya. Mu atubeje ọ mu a-bya gę mu aharu ndu ndu-unu pfuta yeru Kéreshi gę mu epfukwa iya phọ l'ọhamoha ọzo, abụkwapho ndu Jiu. <sup>14</sup> Ọ mu jikwa onyemonye ọgwọ ezi ozi-ọma ono. Mu ji iya ndu Gurisu bya ejiru iya ndu abudu ndu Gurisu. Mu ji iya ndu gụru ẹkwo; bya ejiru iya ndu aguduru ẹkwo. <sup>15</sup> Noo g'o gude ọ nọdu agụ mu ẹgu abya ezi unube ndu nọ ọ ọ Romu ozi-ọma onokwaphọ.

### *Ike ophu Chileke gude adzo ndiphe*

<sup>16</sup> L'iphere ezi ozi-oma ke Kéreshi ono ta adukwa mu. Kele o kwa iya bu ike, Chileke gude adzo iphe, bukpo ndu kwetaru ke Kéreshi. O gude iya vuru uzo adzo ndu Jiu; ndu ta abudu ndu Jiu nodu etso phe. <sup>17</sup> L'o kwa ozi-oma ono be Chileke gude egoshi apfubekoto nkiya, bu iya bu ekweta nkiya, shita l'ishi jasu l'ikpetemazu; bu iya bu g'e deru iya l'ekwo-opfu Chileke su: "Onye pfuberekoto e-gude ekweta nodu ndzu."

### *Ikpe, nmaru ndiphe l'ophu*

<sup>18</sup> O buru iya meru g'o gude Chileke shiwaa l'imigwe goshi ge ya e-gude oke-ehu-eghu iya mee ndiphe; mbu oke-ehu-eghu, l'eghu iya nu le ndiphe kpuru iya ebo l'afu; teme ephe nodu eme ejo ememe. Ephe gude ejo ememe, ephe eme akparya okpobe-opfu ono ishi. <sup>19</sup> Iphe, gbaru nemadzu g'o gogo maru iya le ke Chileke be dabyiru eba l'iphu iya; kele Chileke goshiru phe iya l'onwiya. <sup>20</sup> Eshikpo teke Chileke meru mgboko be nemadzu shiwaa l'iphe, Chileke meshiru maru egube onye o bu okpobe amaru. L'ike iya, nyiberu anyibe a-no ojejeje; teme o buru iya gedegede bu Chileke. Oo ya bu l'ephe ta agofuedu. <sup>21</sup> Le nemadzu machacharu le Chileke du; ophu ephe akwabejedu iya ubvu l'o bu Chileke; ophu ephe ekelejedu iya ekele. O chia iphe, meru nu bu l'egomunggo sweshihwaru phe; k'ophu oriri phe buwaa iphe-mmanu; o buwaru eme eswe jiru phe obu; k'ophu obu phe gbahwaru tsukiribaa. <sup>22</sup> Ephe gude l'ephe suru l'ephe maru iphe; kabakporo

aburu ndu eswe. <sup>23</sup> Ēphe woru ùbvù, e gege akwabẹ Chileke ono, a-nọ je aduwaruro aduru ono ye l'azu bya abaaharu ntekpe eja; ntekpe, e megbaaru o du ge nemadzu, ta adudu eka oonob-beru; ozoo g'enu, ephe l'eli; ozoo g'anu; ozoo g'agwo.

<sup>24</sup> Noo g'o gude Chileke paru phe haa; ephe melahaa ejo ememe, bu iphe, agu obu phe. Ēphe wata eme onwophe njo ememe. <sup>25</sup> Nemadzu woru iphe, bu okpobe-opfu ke Chileke ye l'azu; kweta iphe, bu uka; bya awata abaru iphe, Chileke meru ememe eja; akwabẹ iya ùbvù; haa Chileke ono, meshiru iya nu ono; bu onye o gbaru ke g'anyi tuje epha jasụ le tuutuutuu le mijimiii. Nokwa g'o du.

<sup>26</sup> O buru iphe ono meru g'o gude Chileke paru nemadzu haa; ephe wata aji momomo; eme iphe du ideyideyi. Ke g'unwanyi phe haje ejepfu unwoke, bu iphe, Chileke medoru phe; wata ejepfu unwanyi ibe phe. <sup>27</sup> Nokwapho g'unwoke phe haru ejepfu unwanyi, bu iphe, gbaru phe nu; egu ejepfu unwoke ibe phe nodu anoduje enwu phe phuruphuru g'oku l'ehu. Nwoke yee nwoke ibe iya wata akwakwa. Ēphe watanu ahuma urwu, gbaru oriri, sweshihuru phe nu l'ehu phe.

<sup>28</sup> Su-a; eshinu ndiphe te ekwedu amaru iphe, bu okpobe-opfu le ke Chileke; Chileke paru phe haa; ephe nodu arije oriri, enwedu ishi; watanu eme iphe, agbaduru phe nu. <sup>29</sup> Ophu o dudu egube ejo ememe; me iphe, apfuduru-oto, ephe te emedu; k'ophu oobushihu phe ebushihu l'ehu. Ēphe nodu aji momomo g'ephe naa iphe, abudu nkephe; edoberu nwibe phe okpoma mgbashi.

Enya p̄furupfuru paa p̄he ẹka l'ẹhu; ẹphe n̄odu egbu ọchi; esephe opfu opfu bya agho-phe ụgho; ẹphe n̄odu eme iphe-ashi; bya asu-phe asulasu.

<sup>30</sup> Ẹphe n̄odu evu nwibe p̄he nvu azu; buru ndu Chileke du ashi; ndu anoduje eme nwibe p̄he iphe-iphere l'obu oku; buru ndu eme nggangga bya etse etsetse. O buerupho g'ẹphe e-me mee ejo-iphe be ẹphe anoduje ari; teme ebe ẹphe ekwejedu eme iphe, ne p̄he le nna p̄he pfuru.

<sup>31</sup> Ẹphe bu ndu enwedu egomunggo; ophu e gudedu ire p̄he ẹka. Ẹphe ta aphujeduru nwibe p̄he obu-imemini; ebe ẹphe enwedu obu-oma.

<sup>32</sup> Ẹphe bu ndu machacharu iphe, bu ikpe Chileke; maru le ndu eme egube ejo-iphe ono bu onwu, bu iphe, gbaru p̄he nu. Ophu o budua l'ẹphe eme nno; obenu le ndu eme g'ẹphebedua agbeje du p̄he ree.

## 2

### *Ikpe, Chileke nmaru onyemonye*

<sup>1</sup> Noo g'o gude mu su ngu l'i ti gofukwapho gube onye ophu ekpe onye ozo ikpe; onye i buhabe. Kele o o iphe ono, iikpe onye ozo ikpe iya ono be i gudekwapho anma onwongu ikpe. Kele gubedua, l'ekpe ikpe emekwapho iphe ono, iikpe onye ozo ikpe iya ono. <sup>2</sup> O le ophu anyi makaharu bu l'ikpe Chileke pfuru-oto l'ẹhu ndu eme egube iphe ono. <sup>3</sup> Gube nwodumeka; ?I dobesu le teke igbarwushije ndu eme egube iphe ono; bya emekwa iya pho l'onwongu; ?i dobesu l'ii-nahu ikpe ke Chileke? <sup>4</sup> ?To; bu eze odoo ophu paru ẹka apaa, Chileke emeje;



bụkwanu ndu bụ ndu maru ekemu bya emeela iphe-ẹji bẹ Chileke e-gudekwaphọ ekemu ono nmaa ikpe. <sup>13</sup> L'ọ tọ bụkwa ndu anụmaje ekemu bẹ bụ ndu pfuberekoto l'iphu Chileke; ọ chia ndu eme iphe, ekemu pfuru bụ ndu Chileke agụ lẹ ndu pfuru-oto. <sup>14</sup> Lẹ teke ọ bụ lẹ ndu abudu ndu Jiu, bụ iya bụ ndu amadu ekemu gbẹ egudeje uche phẹ eme iphe, dụ l'ekemu; bụ nụ iya-a bụ l'ẹphe egoshi l'ẹphe maru iphe, gbaru phẹ l'ememe; obeta ẹbe ẹphe amadu ekemu. <sup>15</sup> Umere phẹ egoshi l'iphe, ekemu pfuru bẹ Chileke dewaru phẹ l'obu. Teme egomunggo phẹ nọdu agbakwa phẹ phọ ekebe; eshinu ọriri phẹ anọduje anmaa phẹ ikpe bya ahajekwarupho aharu phẹ enge. <sup>16</sup> Mbọku ono, Chileke ekpe ikpe ono bẹ ọo-gbẹ Kéreshi Jizosu l'eka kpee nemadzu ikpe iphe, nemadzu arije domia l'okpoma iya. Noo iphe, ozi-oma ono, mu anọduje ezi onoya pfuru.

### *Ndu Jiu ẹphe l'ekemu*

<sup>17</sup> A bya l'ẹhu gubedua, bụ onye Jiu; ị nọdu etu onwongu onye Jiu bya akporu obu ye l'ekemu; bya egude gule Chileke aba l'abaa. <sup>18</sup> Ị maru iphe, bụ uche Chileke; teme ekemu iya nọdu egoshi ngu iphe, gbaru ngu l'ememe; mẹ iphe, agbaduru ngu l'ememe. <sup>19</sup> Ị makaharu l'ị bụ onye edu ndu atsụ ishi; bya aburu iphóró kẹ ndu nọ l'ochii. <sup>20</sup> Ị bụru onye akpo-ziru ndu eme eswe ụzo; bya aburu onye ezi ndu bụ unwegirima iphe. Ị maru ekemu Chileke; bya amaru okpobe-opfu dụ l'ekemu ono. <sup>21</sup> Ọo ya bụ; eshi ọphu iinoduje ezi ndu ọzo; ?bụ gunu kparu iphe, i tii

zidu onwongu? Gube onye ara iya arara sụ g'e te zijeshi iphuru; ?tii zikwanụ iphuru l'onwongu? <sup>22</sup> Gube onye epfu sụ g'e te erijeshi ogori; ?ti rikwanụ ogori? Gube onye ono, agburu nshi, a gwọru agwọgwo tųphe ?ti jejekwanụ ezita iphe, e doberu l'eze-ulo-nshi? <sup>23</sup> Gube onye ono, abaa abaa lẹ Chileke tųru ekemu doberu ngu ono; ? tị nọdujekwanu emebyishi ekemu ọbu; gude iya eme Chileke iphe-iphere. <sup>24</sup> L'e dekwaru l'ekwo-opfu Chileke sụ: “Ndu ọhozo epfubyishi Chileke; ọ buru umere unu kparụ iya.”

<sup>25</sup> Urwu dųkwa l'ebu úbvù bụ eviya; ọle ọo 'ekwapho mẹ ọ -buru l'i meje-a iphe, ekemu pfuru. Obenu teke ọ bụ l'iinoduje emebyi ekemu bẹ gụ l'onye ebuduru úbvù a-gbaru l'ẹji. <sup>26</sup> Nokwaphọ g'ọ dụ onye ebuduru úbvù. Teke ọ bụkwanu l'onye ebuduru úbvù emeje iphe, ekemu pfuru; ?ta agụdu iya l'onye buru úbvù tọo? <sup>27</sup> Ọo ya bụ lẹ ndu abụdu ndu Jiu ono, bụ ndu ebuduru úbvù ono l'a-nma gube onye Jiu ikpe. Unubedua, bụ ndu Jiu nweru ekemu, e deru l'ekwo bya ebua úbvù; tẹme unu gbẹ emebyi ekemu. <sup>28</sup> Onye buepho onye Jiu l'enya ndiphe ta bụkwa iya bụ l'a bụ onye Jiu. Ọphu ebu úbvù ọphu eebu l'anụ-ẹhu abụkwa iya phọ bụ l'e buru úbvù. <sup>29</sup> Iphe, bụ ọkpobe onye Jiu bụkwa onye bụ iya nụ l'ime ọkpoma iya. Ọkpobe ebu úbvù; buru ọphu eebu l'ime obu, bụ iya bụ ọphu Unme Chileke buru nemadzụ; ọ tọ bụkwa ọphu e buru l'ọo g'e mee ya g'e deru l'ekwo ekemu. ẹgube onye ono ta abụkwa nemadzụ ajajẹ iya ajaja; ọ kwa Chileke bẹ ajajẹ



iya nù.

### 3

<sup>1</sup> Sù-a; ?bùkwanu gùnu bè onye Jiu gude ka onye abùdu onye Jiu mma? ?Dènwkwanu urwu, dù l'ebu úbvù? <sup>2</sup> Ọ kwatakpòkwaaru baa urwu, ha shii l'uzomuzo. Kẹ mbù kpòada bù l'ọo ndu Jiu bè Chileke woru opfu, o pfuru ye l'ẹka. <sup>3</sup> Lẹ-a; ọme ọ bùkwanu l'ẹphe harù buru ndu ekwetaduru nù teke ono; ?e gege gude l'ẹphe te ekwetaduru sù lẹ Chileke bè ta agbaeduru g'e gude ire iya ẹka tọ? <sup>4</sup> Tùswekwa! G'e goshichikwa lẹ Chileke ta adudu teke ọ buedupho onye ire-lanù g'ọ bù; o betakpọoru nemadzu mgburugburu je a-bueberu ndu ntuphu-ire. Noo iphe, e deru l'ẹkwo-opfu Chileke sù:

“Ọo l'opfu ngu Chileke bè  
ee-shi goshi  
l'ì bù onye pfuru ọto.

Ọphu ọ dudu teke e kuru ngu  
ikpe g'i ti kpefu.”

<sup>5</sup> Teke ọ bùkwanu l'ọo l'anyi ta agbaduru g'e gude ire anyi ẹka emeje g'a hùma gẹ Chileke gbaberu k'egude ire iya ẹka; ?bùhunu gùnu bè anyi e-pfu? ?Anyi a-sù lẹ Chileke meru ejo-  
iphe l'ọ kpaberu anyi oke-ẹhu-eghu iya? Nta bè mu ajikpoakwa aji-a gẹ ndiphe ọzo anọduje aji.  
<sup>6</sup> Tùswekwa! Ọ -bù l'ọ tọ dù nno mẹ ?Chileke emehunu imagha oo-kpe ndiphe ikpe?

<sup>7</sup> Lẹ-a; teke ọ bù onye ntuphu-ire; ọ buru iya agbeje mee g'a kabaa amaru lẹ Chileke bù onye ire-lanù; jaa ya ajaja; ?dènu g'o gude Chileke

jehunu a-nma mu ikpe lẹ mu bu onye iphe-  
 eji? <sup>8</sup> ?Bu gunu kparu iphe, anyi tee pfudu iphe  
 ono, ndu anọduje agbaru anyi mgbamu; ebo  
 anyi ibo sūru l'anyi epfuje ono? Iphe ono bu:  
 “G'anyi meanarọ ejo-iphe g'ee-shi gẹ k'oma eshi  
 iya futa.” Ndu ono bẹ Chileke a-nmakwa ikpe,  
 bu iphe, gbaru phẹ nu.

*Ikpe, nmaru onyemonye*

<sup>9</sup> ?Nta-a-ee? Onodu anyibe ndu Jiu ?ọ ka kẹ  
 ndu abudu ndu Jiu mma to? Tuswekwa! Anyi  
 ta akakpoda phẹ mma ililekpoo. Iphe, anyi  
 goshiru bu l'anyibe ndu Jiu; mẹ ndu abudu ndu  
 Jiu tukoru buru ndu iphe-eji pyitaru l'ekpiri.

<sup>10</sup> L'e dekwaru l'ekwo opfu Chileke su:

“O to dukwa mẹ onye  
 pfuberekoto;  
 mbukwa m'onye lanu.

<sup>11</sup> Ophu o dudu mẹ onye lanu,  
 nweru egomunggo;  
 ophu o dukwapho onye  
 eseje gẹ ya maru Chileke.

<sup>12</sup> Onyemonye ghawaru Chileke  
 azu.

Ephe tukowaru yifu.  
 O to dudu onye ophu eme  
 iphe, pfuru-oto  
 g'ọ ka mma l'oo onye lanu.

<sup>13</sup> Ekpiri phẹ bu ilu, gheru onu.  
 Ire phẹ bẹ ephe egudeje  
 edepushi nwibe phẹ.  
 Opfu, shi phẹ l'onu nodu  
 egbu egbugbu

- g'ẹru ẹjo agwọ.  
 14 Iphe, jiru phe ọnu bu ephu  
 iphu  
 yẹ opfu, shi l'ọkpoma  
 mgbashi.  
 15 Ẹphe ekwoje gburumu je  
 egbua nemadzu.  
 16 Ụzo, ẹphe eshi bu iphe,  
 aduje iya nu bu ọla-l'iswi  
 yele aphu.  
 17 Ẹphe ta amadu ụzo nchi  
 adu-doo.  
 18 Ophu ẹphe ta atsudu Chileke  
 ebvu ililekpoo.”\*

19 Ophu anyi makahakpooru bu l'iphemiphe, e deru l'ekwo ekemu Chileke bu ndu a tudoru ekemu obu be e dedoru iya. Oo ya bu g'o to du onye a-gofu nu. Onu aburu onyemonye kpurukudukuu; wafua g'onyemonye eshi egube ono buru onye-ikpe nmaru l'iphu Chileke. 20 Iphe, o gude o du nno bu l'o to dudu onye a-su le ya e-gude eme g'ekemu pfuru buru onye pfuberekoto l'iphu Chileke; eshinu iphe, ekemu emeje bu l'o meje ge nemadzu maru le ya mewaru iphe-aji.

*Apfubekoto ophu shi l'ekweta*

21 Obenu le nta-a be e goshiwaru iphe, bu apfubekoto ke Chileke, abuedu ophu shi l'edobe ekemu. Iphe ono buru iphe, ekemu me ndu mpfuchiru Chileke gbaru ekebe iya. 22 Apfubekoto ke Chileke-a; shi l'ekweta anyi kwetaru ke

\* **3:18** 3:18 Gūnaa Ebvū 36:1.

Jizosú Kéreshi rwube anyi ẹka. Ọ tọ dudu onye ọogufuje mę nanu; <sup>23</sup> kele onyemonye mewaru iphe-ẹji; shi nno nafu onwiya ọdu-biribiri ke Chileke. <sup>24</sup> Obenu le Chileke mewaru onyemonye eze-iphe-oma ke mmanu gua ya l'onye pfulerekoto. Ọ buru onye o shi l'eka mee ya bu Kéreshi Jizosú onye meru g'ephe nweru onwophe. <sup>25</sup> Chileke goshiru Kéreshi l'edzudzu-oha g'ọ buru ẹja, e gweru gwefu iphe-ẹji ndiphe. Ọ buru mee, Kéreshi ono gbashiru teke ọ nwuhuru ono be Chileke egudeje aguru nemadzu nvu l'iphe-ẹji iya; mbu ndu woru onwophe ye iya l'eka. Chileke shi egube ono mee ge ya goshi le ya pfulerekoto. Le teke ndiche be Chileke shi abujeru onye meru iphe-ẹji l'ọ taęlaa nshi lephua ya ęnya. <sup>26</sup> Ọle nta-a be oogoshije ge ya eshije mee ndiphe g'ephe buru ndu pfulerekoto; kele yębedua bu onye pfulerekoto bya abukwarupho onye emeje iphe, bu ndu kwetaru ke Kéreshi g'ephe buru ndu pfulerekoto.

<sup>27</sup> Su-a; ọ dukwaduru onye duru iphe, ọonodu aba l'aba nta? Ọ tọ dukwa. Ọ buru ẹka o meru imagha? Ọ bu l'anyi eme iphe, ekemu pfuru to? Waawakwa. Ọ buakwaa l'anyi woru onwanyi ye Kéreshi l'eka. <sup>28</sup> Kele iphe, anyi maru bu le Chileke agujeekwapho nemadzu l'onye pfulerekoto me ọ -buru l'onye ono kwetaru ke Kéreshi; ọ tọ bukwa shita l'eme iphe, ekemu pfuru. <sup>29</sup> Chileke ọ bu Chileke ndu Jiu kpurumu to? Ọ to buedu Chileke ke ndu abudu ndu Jiu? Ee! Ọ bufua Chileke ndu abudu ndu Jiu. <sup>30</sup> Ọ buepho Chileke lanu du kpoloko. Ọ buru iya a-gu

ndu Jiu, kweru ke Kéreshi le ndu pfuberekoto; bya abukwaru iya pho a-gu ndu abudu ndu Jiu, kweru ke Kéreshi le ndu pfuberekoto. <sup>31</sup> ? O pfuru l'anyi gudewaa k'ekweta-a rwutoshia ekemu to? Tuswekwa! Iphe, anyi emechia bukwa g'ekemu nguru anguru.

## 4

### *Iphe-nggoshi, Ébirihamu meru*

<sup>1</sup> ?Denu iphe, anyi e-pfu le ke Ébirihamu, bu nnaji ndiche anyi phe? ?Denu g'o nwuru ye ya? <sup>2</sup> Le teke o bu l'oo iphe-oma, Ébirihamu metaru be Chileke gude gua ya l'onye pfuberekoto; be o nwekwaru iphe, o gogo gude aba l'abaa; ole o to bukwanu l'iphu Chileke. <sup>3</sup> Noo iphe, e deru l'ekwo-opfu Chileke su: "Ébirihamu kwetaru ke Chileke; a guaru iya ya l'apfubekoto." <sup>4</sup> Su-a; onye jeru ozi be a ta sujekwa l'iphe, a nuru iya le k'ozi ono bu iphe-oma be e meru iya; gbahaa l'oo ugwo, rwuberu iya nu be a pfuru iya. <sup>5</sup> Obenu le teke nemadzu gwoberu k'ese akanya ehu iya; bya ekweta ke Chileke ono emeje g'onye iphe-eji buru onye pfuberekoto ono; a guaru iya ya l'apfubekoto. <sup>6</sup> O kwapho iphe, du nno be Dévidi tuberu epfu teke ono, o pfuru k'ehu-utso nwoke ophu Chileke guru l'onye pfuberekoto; l'ebe abu l'o gude eka iya meta ge Chileke nata iya. <sup>7</sup> O suru:

"Ehu-utso be a goru nu ndu a guru nvu  
l'iphe, epe mesweru; ndu a  
safubebewaaru iphe-eji, epe megbaberu.

<sup>8</sup> Ehu-utso bu k'onye Nnajiuphu taa

gũkoeduru iphe-eji ililekpoo.”\*

<sup>9</sup> ?Ọ dũ g'ọ buẹpho ndu buru úbvù kpẹekpu bẹ Chileke epfu l'ẹka-a g'ẹhu tsoo uto? Tọ; ? ndu ebuduru úbvù yi iya-a? Eshinu anyi sũru: “Ébirihamu kwetarũ kẹ Chileke; a gũaru iya ya l'apfubekoto.” <sup>10</sup> ?Denu g'eshiru gũaru iya ya? ? Bũ teke o toko budu úbvù; tọ g'o buwaru úbvù? Ọ gũadaru iya ya tẹme o bua úbvù. <sup>11</sup> Úbvù ono, o buru ono buru iphe-ọhubama, goshiru lẹ Chileke gũru iya rọ l'onye pfuberekoto; kẹle o kwetarũ kẹ Chileke teke o toko budu úbvù. Ọo ya bũ gẹ Ébirihamu abũru nna k'iphe, bukpuo ndu woru onwophẹ ye Chileke l'ẹka; ndu Chileke gũru lẹ ndu pfuberekoto l'ẹbe abũ l'ẹphe buru úbvù. <sup>12</sup> Ọ bukwarupho nna ndu buru úbvù; ọle ọ tọ bukwa nna phẹ; opfu l'ọo l'ẹphe buru úbvù; iphe, o gude buru nna phẹ bũ l'ẹphe tsoru ẹka Ébirihamu, woru onwiya ye Chileke l'ẹka tẹme o bua úbvù.

### *Ọphu bũ ishi bũ ekweta*

<sup>13</sup> Chileke kweru Ébirihamu yẹ awa iya ukwe-iphe sũ phẹ: l'ọo phẹ e-nweru mgboko. Ọ tọ bukwa lẹ Ébirihamu meru iphe, ekemu pfuru meru iphe, o gude kwe iya ukwe-iphe ono. Ọ kwa l'o kweru kẹ Chileke meru iphe, Chileke gũru iya ya l'apfubekoto. <sup>14</sup> Sũ-a; ọme ọ bũ ndu eme iphe, ekemu pfuru bẹ e-nweru mgboko ono, Chileke kweru ukwe iya ono mẹ ekweta abũru iphe-mmanũ; mẹ ukwe-iphe, Chileke kweru tege

\* 4:8 4:8 Gũnaa Ebu 32:1,2.

vukwaruphọ ire. <sup>15</sup> Kẹle ekemu akpatsuje oke-ẹhu-eghu. Noo l'ẹka ekemu adudu bẹ emeswe adukwapho.

<sup>16</sup> Noo g'o gude iphe, Chileke kweru ukwe iya ono buru iphe, shi l'ekweta; g'ee-shi g'oo-buru iphe, shi l'eze-iphe-oma, oome; mbu ophu o mekwarupho gbabe awa Ebirhamu. O to bukwapho ndu emeje iphe, ekemu suru g'e meje kpurumu. Chileke dobekwaru iya pho iphe, bu ndu kwetaru nu ge Ebirhamu kwetaru. Lo kwa Ebirhamu bu nna anyi g'anyi hakotakpoo. <sup>17</sup> O buru iya bu iphe, e deru su: "Mu meakwaru ngu nna igwerigwe oha." Oo ya bu le Ebirhamu bu nna anyi l'iphu Chileke, bu onye o kweru nkiya; mbu Chileke, emeje ndu nwuhuru anwuhu g'ephe dzuru ndzu ozo; teme o nodu emeje iphe, eshihaada du nu l'oo-bya adu. <sup>18</sup> Ebirhamu woru onwiya ye Chileke l'eka; bya anodu ele enya iphe; teke adudu iphe, o tuberu ele enya iya. Oo ya bu; o buru nna ohamoha, du igwerigwe, bu iya bu nu iphe, e pfuru iya su: "Noo g'awa ngu a-ha bu ono."

<sup>19</sup> Ophu o dudu teke Ebirhamu kwenyaaru ke Chileke bya akpohaa okpolohu. Ophu o pfuduru kele ya kahwaru; libahuchawaa alibahu ophu ya a-duedu ike eye ime; l'eka o nowaru iphe, ha g'ukporo apha ise eshinu a nwuru iya; ophu o pfuduru ke nyee ya, bu Sera, ata tsudu ime. <sup>20</sup> O to dudu teke obu bojeru iya ebo l'iphe, Chileke kweru iya ukwe iya; kele o noshierupho ike l'eka Chileke akwabee ya pho ubvu. <sup>21</sup> O dokporu iya enya okpobe

edodo lẹ Chileke sūru emekọta iphe, o kweru iya ukwe iya. <sup>22</sup> Noo g'o gude Chileke gūaru iya ya l'apfubekoto. <sup>23</sup> O tọ bukwa l'iswi ẹhu Ẹbirihamu kpẹekpu bẹ e dedoru iphe ono, e deru sū: A gūru iya ya l'apfubekoto. <sup>24</sup> O kwa l'iswi ẹhu anyibedua bẹ e dedokwaru iya pho, bụ ndu Chileke e-mechaa gūa lẹ ndu pfuberekoto; mẹ o -buru l'anyi kweru kẹ Chileke, bụ iya bụ onye meru Nnajiuphu anyi, bụ Jizosu; o shi l'onwu teta dzuru ndzū. <sup>25</sup> Jizosu ono bẹ Chileke haru; o gude onwiya gwee ẹja nwuhu k'ophu oo-gwefu iphe-ẹji, anyi meshiru. Chileke bya emee ya; o shi l'onwu teta dzuru ndzū g'e-shi gẹ ya agūa anyi lẹ ndu pfuberekoto.

## 5

### *Adu lẹ mma onye lẹ Chileke*

<sup>1</sup> Oo ya bụ lẹ Chileke gūwaru anyi lẹ ndu pfuberekoto opfu l'anyi kweru nkiya. Nta-a bẹ anyi shiwaa l'ẹka Nnajiuphu anyi, bụ Jizosu Kéreshi; ẹhu dūwaa anyi guu l'onodu anyi lẹ Chileke. <sup>2</sup> Oo Jizosu Kéreshi ono shi l'ekwekwe, anyi kweru nkiya duba anyi l'eze-iphe-oma owanawa, anyi gude dzuru ndzū-a. Ẹhu nọdu anọduje atsọ anyi l'anyi ele ẹnya l'anyi lẹ Chileke e-mechaa gbaru mgbā l'odu-biribiri iya. <sup>3</sup> O tọ bukwa ono kpurumu; ẹhu atsojekwapho anyi utso mẹ anyi nọdu eje iphe-ẹhuka; opfu l'anyi humawaru l'oo l'iphe-ẹhuka bẹ eeshije nwuta ata nshi. <sup>4</sup> O buru ota-nshi emeje g'anyi shihu ike l'ohutama. Anyi eshi ẹgube ono kabaa apfushi ike l'iphe, anyi ele



ɛnya iya. <sup>5</sup> Ophu ele ɛnya iphe ono, anyi ele ono emebyidu anyi iphu; kele Chileke l'onwiya mewaru anyi gbɛ l'ɛka Unme-du-Nso, ɔ nɔru anyi maru gɛ n-yemobu iya habe shii.

<sup>6</sup> L'ɔ kwaduro teke adudu ike, du anyi k'eme iphe, du ree l'iphu Chileke bɛ Kɛreshi byaru bya anwuhu-chiru ndu ata tsudu Chileke ebvu. Iphe ono buru teke Chileke tɔberu bɛ o meru.

<sup>7</sup> Kele ɔ dukwa lɛ ntà gɛ nemadzu e-shi nwuhu-chiru onye pɔberekoto. O lɛ a -choje iya bɛ aa-humakwaa onye a-nwuhu-chiru onye oma.

<sup>8</sup> Obenu lɛ Kɛreshi nwuhuru l'iswi ɛhu anyi teke anyi bukwaɔdu ndu eme iphe-ɛji; shi nno goshi lɛ Chileke yenukaru anyi obu. <sup>9</sup> Oo ya bu l'eshinu Chileke shiwaa l'anwuhu, Jizosu nwuhuru; gua anyi lɛ ndu pɔberekoto l'iphu iya bɛ oo-

kabakpɔkwanu adu ike shi l'ɛka Kɛreshi ono dzota anyi; g'a taa tu-koshidu anyi oke-ɛhu-eghu iya. <sup>10</sup> Su-a; eshinu anyi shi buru ohogu Chileke; Chileke bya eshiwaa l'anwuhu, Nwa iya nwuhuru mewaa anyi buru onya iya; bɛ nta-a, anyi buwaa onya iya-a bɛ ndzu Kɛreshi ophu no anyi l'ɛhu a-kabakpɔkwaanu adzota anyi l'oke-ɛhu-eghu Chileke. <sup>11</sup> Ophu ɔ budua ono kpoloko;

anyi nokwapho l'ɛka Nnajiuphu anyi, bu Jizosu Kɛreshi ete eswa; mbu onye ono, meru anyi lɛ Chileke doshiwaa ono.

### *Adamu lɛ Kɛreshi*

<sup>12</sup> Su-a; ɔ kwa nwoke lanu bɛ iphe-ɛji shi l'ɛka bata lɛ mgboko. Onwu shikwapho l'iphe-ɛji ono batakwapho lɛ mgboko. Oo ya bu; onwu shi nno swiru iphe, bukpo nemadzu; kele onyemonye

mewaru iphe-ẹji. <sup>13</sup> Iphe-ẹji dzuhaakwaru eliphe tẹme ekemu bya. Ọle a ta gụkoduru nemadzu iphe-ẹji l'ẹka ekemu adudu. <sup>14</sup> Ọle ọnwu shielaa l'ogbo ke Adamu phe buru eze jasu l'ogbo ke Mosisu; mbu buchaaru eze ndu emesweduru ekemu ge Adamu mesweru.

Adamu l'onwiya bu onyonyo Kereshi, bu iya bu onye ophu, e-mehaa byanu pho. <sup>15</sup> Obenu l'iphe-oma ke Chileke be a ta tukwa eyeru iphe-ẹji ke Adamu. Kele o -buru l'iphe-ẹji, onye lanu meru; be meru a du igwerigwe nwuhu; nokwapho ge Chileke a-kabakpo eshi l'eka onye lanu ono, bu Jizosu Kereshi meeru ndu du igwerigwe eze-iphe-oma, nyiberu anyibe. <sup>16</sup> Ophu iphe-oma ke Chileke adukwanu ge iphe-ẹji, onye lanu meru. Likpe, nmakotaru ndiphe mgburugburu k'iphe-ẹji ono. Obenu l'iphe-oma ophu Chileke meru nyiberu igwerigwe iphe-ẹji; shi nno mee aguhaa ndiphe le ndu pfuberekoto. <sup>17</sup> Kele eshinu o bu emeswe, onye lanu mesweru be onwu shi l'eka onye lanu ono buru eze; be ndu ono, shiwaa l'eka Jizosu Kereshi nata eze-iphe-oma ke Chileke ono, bu iphe-oma ophu nyiberu anyibe ono; waa iphe-oma ophu bu apfubekoto; ndu ono a-ndu l'eka onye lanu ono, bu Jizosu Kereshi buru eze le ndu-a.

<sup>18</sup> Oo ya bu l'oo g'emeswe, onye lanu mesweru kparu iphe, Chileke nmakotaru onyemonye ikpe; bukwapho ge Chileke shi l'apfubekoto Kereshi mee g'ikpe kaleru onyemonye ge ndu du phe. <sup>19</sup> Kele oo ge nwoke lanu ono meru iphe, Chileke suru g'o to meshi; e shi egube ono mee ndu du

igwerigwe ẹphe buru ndu iphe-ẹji; bukwapfo g'ee-gude k'onye lanu ọphu meru iphe, Chileke suru g'o mee; Chileke agua ikpoto nemadzu le ndu pfuberekoto.

<sup>20</sup> Iphe, e gude e mechaa tua ekemu dobe bukwa g'a kabaa amaru g'iphe-ẹji habe shii. Obenu l'oo teke a kabaa amaru g'iphe-ẹji habe shii; eze-iphe-oma ke Chileke akwata kabak-waapho shii. <sup>21</sup> O kwa anwuhu be iphe-ẹji gude buru eze. Nokwapfo g'o bu apfubekoto be eze-iphe-oma ke Chileke gude bukwarupho eze. O buru apfubekoto ono, shi l'eka Nnajiuphu anyi, bu Jizosu Kereshi ono edu anyi ala le ndzu ọphu onwu ta aduhedu.

## 6

### *Iphe, baputizimu eme*

<sup>1</sup> Su-a; ?bu awe be anyi suseru iya ishi nta-a? ?Anyi a-nduje eme iphe-ẹji g'eze-iphe-oma ke Chileke aka shii to? <sup>2</sup> Tuswekwa! ?Denu g'anyi be ndu nwuhwaru anwuhu l'iphe-ẹji e-shi ndukwapfo ndzu l'ime iya ozo? <sup>3</sup> To ? unu ta amadu l'e shiwaa le baputizimu mee anyi du igwerigwe buru ndu a tugbareru l'anwuhu ono, Kereshi ono? <sup>4</sup> Le teke ono, e meru anyi baputizimu ono be anyi l'iya tukoakwaru nwuhu; a toko anyi l'iya likota. Oo ya bu le-a; oo egube ono Kereshi gude ike akpabiri ke Nna shi l'onwu gbalihu dzuru ndzu ono bukwapfo g'anyi a-du ike dzuru ndzu ọphuu.

<sup>5</sup> O -buru l'anyi le Kereshi tugbaru buru nanu l'anwuhu, du g'ọphu o nwuhuru; o n'iya bu

Chileke emee g'anyi shi l'õnwu teta g'o meru iya; anyi l'iya adzuru ndzu òphúú. <sup>6</sup> Ophu anyi maru bu òwa-a: l'e wotaru akahụ onye anyi shi buru woru yee Kéreshi tuko kpopyabe l'oswebe; ọo ya bukwanu; g'ee-mebyia ike k'ejo obu ono, anyi shi nweru teke ono, buepho iphe-ẹji be anyi shi maru ono; g'anyi ata abueduru ohu k'iphe-ẹji. <sup>7</sup> L'ọ kwa teke nemadzu nwuhuru bu teke yele ike k'eme iphe-ẹji tokaharu ishi anamu. <sup>8</sup> Teke ọ bukwanu l'anyi le Kéreshi tugbaru nwuhu be anyi maru l'anyi l'iya atukokwapho dzuru ndzu. <sup>9</sup> L'iphe doru anyi enya bu l'eshinu Chileke meru ge Kéreshi shi l'õnwu teta dzuru ndzu be ọ to nwuhubaedu ọzo. Anwuhu ta abyadu akabaa ya ike ọzobaa. <sup>10</sup> Anwuhu ophu ọ nwuhuru bu l'ọ nwuhuru mgbo lanu kpoloko kpeekpu g'o mekpee iphe-ẹji. Ndzu ophu ọ dzu nta-a buwaru ge yee Chileke buru nanu jaswaruroya. <sup>11</sup> Nokwapho g'unu a-guje onwunu l'unu buwaa ndu nwuhuru Anwuhu me a -bya l'eka iphe-ẹji no. Oe eshinu unu le Kéreshi Jizosu tugbawaru buru nanu be buwaa Chileke be unu dzuru ndzu.

<sup>12</sup> Unu te ekwekwa g'iphe-ẹji buru eze l'ehu unu ọwa-a, bu ophu a-nwuhu Anwuhu-a; k'ophu bu l'oo ejo-iphe, agu unu, ọ suru g'unu mee be unu e-meje. <sup>13</sup> Unu te ewokwaru iphe, no unu l'ehu g'ọ hahabe nwanshii haaru iphe-ẹji g'ọ buru iphe, o gude ejepfu iphe, pfuru oto ọgu. O chia iphe, unu e-me bu g'unu woru onwunu hagbuaru Chileke l'unu buwaa ndu shi l'õnwu futa bya anodu ndzu. Oo ya bu ge Chileke egude unu alwu ọgu iphe, pfuru oto. <sup>14</sup> Iphe-ẹji ta

akaedu unu ike; eshinu ekemu ekeeduru unu egbu; kele nta-a be Chileke gudewaa eze-iphe-oma iya too unu l'egbu ekemu ono.

*Aburu ohu k'apfubekoto*

<sup>15</sup> Su-a; ?o pfuru l'anyi anoduwaro eme iphe-iji; opfu l'eze-iphe-oma ke Chileke tofuwaruanyi; ebe ekemu ekeeduruanyi egbu to? Tuswekwa! <sup>16</sup> Unu ta amahaadaa le teke unu woru onwunu haaru nemadzū bya emeje iphe, o pfuru g'ohu iya be unu buwaa ohu onye obu, unu emeje iphe, o pfuru obu. Teke o bu l'unu woru onwunu haaru iphe-iji; buru ohu iya; unu anwuhu anwuhu, bu iphe, tso iphe-iji l'azu. Teke o bukwanu l'unu emeje iphe, Chileke pfuru; oo ya bu l'oo-gua unu le ndu pfuberekoto l'iphu iya. <sup>17</sup> Ole mu ekele Chileke ekele l'o duru teke unu shi buru ohu iphe-iji; obenu le nta-a be unu gudewaa obu unu g'o ha eme iphe, bu okpobe-opfu ono g'e ziru iya unu. <sup>18</sup> Eshinu a towaru unu l'egbu, iphe-iji shi kee unu be unu buwaa ohu k'apfubekoto. <sup>19</sup> Mu gudeakwaa ehū ohu le nnajiuphu iya anmaru unu etu; odumeka be iphe, mu epfu te edokwa unu enya. Egube ono unu shi woru onwunu haaru ejo umere, rehuru erehu; waa akabaa eme iphe, apfuduru-oto g'e-shi g'iphe-iji akabaa shii ono; bukwapfo g'unu e-woru onwunu haaru eme iphe, pfuru oto nta-a; g'e-shi ge ndzu unu abukotaru ke Chileke.

<sup>20</sup> Kele teke unu shi buru ohu iphe-iji; be unu eshidu eyeru apfubekoto onu. <sup>21</sup> ?Buhunu urwu gunu be unu ritaru l'ejo-iphe ono, unu shi eme ono; mbu iphe ono, iphere iya byaru

adụ unu nta ono? Kele ẹka iphemiphe ono sùberu ishi bukwa anwùhu. <sup>22</sup> Obenu lẹ nta-a bẹ a tọwaru unu l'ẹgbu ono, iphe-ẹji shi kee unu ono; unu bụwaru ohu Chileke. Urwu, unu ritaru iya bụru lẹ ndzụ unu bukotawaa kẹ Chileke. Ẹka ọ sùberu ishi bụru ndzụ ojejoje. <sup>23</sup> Ugwò, aanata l'iphe-ẹji bukwa anwùhu; iphe-oma, Chileke eme bukwanuru ndzụ ojejoje ọphu shi Nnajiuphu anyi, bụ Jizọsu Kéreshi l'ẹka.

## 7

### *Ẹtu iphe, emeje nù l'alulu*

<sup>1</sup> Sù-a; unwunna mu; ?unu ta amadụ lẹ teke ekemu bụ-beru ishi lẹ ndzụ nemadzụ bụ teke onye ono nọ ndzụ? Ọ kwa unubẹ ndu tukuró maru ekemu bẹ mu epfuru. <sup>2</sup> Kele ekemu bụ lẹ nwanyi, alù ji nọfutaje l'ẹka ji iya jasukporu teke ji iya l'a-nọ-beru. Ọle teke a nọnyaaru; ji iya nwùhu bẹ ọ nwewaa onwiya. Ekemu ono, shi gudepyabẹ iya nù ono ta adùedu iphe, ọ bụ. <sup>3</sup> Bụ iya bụ lẹ teke ji iya nọkwadu ndzụ; ọ je aluru ji ọzo; l'aasù l'oori ogori; teke ọ bụ lẹ ji iya nwùhuwaru; l'ọ bụru nwanyi eke ji. Ekemu te egudepyabẹdu iya. Ọ tọ buedu iya eri ogori mẹ ọ -je aluru ji ọzo. <sup>4</sup> Sù-a; noo g'ọ dù l'ẹhu unu bụ ono; unwunna mu. Ọo ekemu shi bụru ji unu; ọle unu lẹ Kéreshi tųgbawaru nwùhu. Ọo ya bụ l'eshi ọphu unu nwùhuwaru bẹ ekemu abùedu ji unu. Ẹbe ọ dùedu iphe, unu l'iya jigba. E mechaa; unu bya adzuru ndzụ ọzo teke ono, Kéreshi tetaru dzuru ndzụ ono. Nta-a, bẹ bụwaa onye ono, shi l'onwu teta dzuru ndzụ ono bụ ji unu; k'ọphu anyi a-dzuru ndzụ,

pfuru ọto meje iphe, dụ Chileke ree. <sup>5</sup> Kele teke ono, anyi shi nọdu ndzụ eme g'ọ gụru anyi ono bẹ ẹgu ẹjo-iphe, shi anọduje enwu phuruphuru l'ẹhu anyi meru anyi shi anọduje eme iphe-ẹji. Iphe, tso eme iphe-ẹji ono bukwanuru ọnwu. <sup>6</sup> Ole nta-a bẹ a dzọwaru anyi l'ẹka ekemu. Anyi nwuhuwaru; nahụ iphe ono, shi kee anyi ẹgbu ono. Ọo ya bụ l'anyi etsowaa ụzo ndzụ ọp̄húú ọp̄hu shi l'ẹka Unme-dụ-Nsọ ẹjeru Chileke ozi. Anyi te etsohẹdu akahụ ụzo ono, bụ iya bụ ekemu ono, e deru l'ekwo ono gude eje iya.

### *Ekemu waa iphe-ẹji*

<sup>7</sup> ?Bụ gụnu bẹ anyi e-pfu nta? Ekemu l'onwiya ? ọ bụ iphe-ẹji tọo? Tụswekwa! Mu tege amakwaru iphe, bụ iphe-ẹji; ọme ekemu ta adụ. Mu tege amakwaru iphe, bụ nchamẹnya ọme ekemu ta asụ: "G'iphe onye ọzo ta agụjekwa ngu." <sup>8</sup> Iphe-ẹji shinu l'ekemu ono kpata ụzo je akpatsushia mu iphe, bukpoọ ẹgu ẹjo-iphe ọzo, dughbaa nụ. Kele ekemu -adudu bẹ iphe-ẹji nwuhukwaru anwuhu. <sup>9</sup> Mbẹdua l'onwomu duru teke mu shi nọdu ndzụ; ọp̄hu mu amadu k'ekemu. A nọnyaa mu bya amaru k'ekemu ono; iphe-ẹji jakerehu mu l'ẹhu; ọ bụru mu anwuhu. <sup>10</sup> Ekemu onoya bụ ekemu, gege eme g'a nọdu ndzụ ono gbẹ bya aburu ikpe bẹ ọ nmaru. <sup>11</sup> Kele iphe-ẹji kpataru ụzo; gude ekemu ono wopyabe mu l'ugho; shi l'ekemu ono woru mu gbua.

<sup>12</sup> Ọo ya bụ l'ekemu l'onwiya dụ nsọ. Iphe ono, a sụru g'e meje ono dụ nsọ; bya aburu iphe, pfuru ọto; bya adu ree. <sup>13</sup> ?Ọ pfuru l'ọo iphe ono, dụ ree ono gbẹ kpataru mu anwuhu tọ?

Tuswekwa! Ọ kwa iphe-eji gude iphe ono, ɗu ree ono kpataru mu anwuhu g'ee-shi g'iphe-eji aburu iphe, aa-huma l'ọ bu iphe-eji. Ọo ya bu ọ Chileke shi l'iphe, e deru l'ekemu eme g'iphe-eji goshigbua ge yebe iphe-eji ɗu-be ideyideyi.

*Iphe labo adzo enya l'ehu amadu*

<sup>14</sup> Iphe, anyi maru bu l'ekemu shi Unme Chileke l'eka; obenu ọ mu bu nemadzu mmanu, iphe-eji gbaru ohu. <sup>15</sup> Umere mu l'onwomu agbachijekwa mu enya; kele mu te emejedu iphe, ɗu mu g'a su ọ mu meru iya. Iphe, mu emejechia bu iphe, ɗu mu ashi ememe. <sup>16</sup> Su eshi ophu iphe, mu agbeje eme bu iphe, mu maru l'ọ to ɗuɗu mu ree; ọo ya bu ọ mu kweru l'ekemu ɗu ree. <sup>17</sup> Ọ n'iya-a bu l'ọ to buɗu mbeɗua l'eme iya. Iphe, eme iya nu bu iphe-eji ono, buwaa mu ebubu l'ehu ono.

<sup>18</sup> L'iphe, mu maru bu l'ọ to dukpoda iphe, ɗu ree, no mu l'obu ililekpoo, bu iya bu l'obu egube nemadzu, mu shi buru teke mu shi anoduje eme ejo-iphe, agugbabe mu nu. Mu emeje ge mu mee iphe, ɗu ree l'ememe; ọle mu ta adujedu ike mee ya. <sup>19</sup> Kele mu te emejedu iphe, ɗu ree, ɗu mu g'a su ọ mu meru iya. Ọo 'epho ejo-iphe ono, ata ɗuɗu mu ge mu mee ya ono be mu emeje. <sup>20</sup> Su-a; o -buru l'iphe, mu agbeje eme bu iphe, adudu mu ree; o n'iya bu l'ọ to buɗu mbeɗua l'eme iya. Iphe, eme iya nu bu iphe-eji ono, buwaa mu ebubu l'ehu ono.

<sup>21</sup> Noo ya bu; mu shi egube ono huma ekemu, ɗu adudu; l'ọ bujeru; teke mu eme ge mu mee iphe, ɗu ree; o buerupho ejo iya akpataje mu



uzo l'èhu. <sup>22</sup> Mu -bya l'ime onwomu bẹ ekemu kẹ Chileke anọdujekpokwaa atso mu uto l'obu. <sup>23</sup> Obenu lẹ mu humaru ekemu ozo, anọduje adzo uzo l'èhu mu. Ekemu k'ono bẹ yele ekemu ophu du mu ree l'egomunggo pho anọduje akpa enya. L'o tua mu mkporo kpuru mu nu iphe-èji. O buru ekemu k'ono bẹ aatujeru mu ekemu ophu kpu mu lẹ ndzu. <sup>24</sup> Nshio mu! ?Bukpoo onye a-dzo mu l'ogwehu owa-a, edu mu ala l'onwu-a? <sup>25</sup> Nta bẹ mu no l'eka Jizosu Kéreshi, bu Nnajiuphu anyi ekele Chileke ekele. Mbụ lẹ mu egudeje egomunggo eme ekemu kẹ Chileke l'onwomu; mu egude anu-èhu mu eme ekemu k'iphe-èji.

## 8

### *Unme, l'anuje ndzu òphúú*

<sup>1</sup> Oo ya bu lẹ ntamanu-a bẹ o to duedu ikpe, nmakwaduru ndu no l'eka Kéreshi Jizosu; ndu te emeedu iphe, agu phe egu ememe; gbahaa iphe, Unme Chileke suru g'ephe mee. <sup>2</sup> Kele ekemu ophu Unme Chileke aturu mu nta-a bu ike, eshije Kéreshi Jizosu l'eka duru nemadzu bahu l'uzo ndzu. O buru ike ono tofuwaru mu l'ike k'ekemu, bu iya eshije l'iphe-èji duru nemadzu bahu l'anwuhu. <sup>3</sup> Iphe, ekemu adudu ike mee opfu lẹ nemadzu ta adujedu ike mee g'ekemu pfuru bẹ Chileke mewaru. O yewaru Nwa iya gedegede; o bya aburu nemadzu; nweru anu-èhu, iphe-èji anọduje akpasa uzo l'èhu g'èhu k'anyi; bya emee onwiya ngweja gwefu iphe-èji, anyi meru; shi nno mebyia ike k'iphe-èji ono.

Chileke shi l'ẹhu ono, Kéreshi nweru ono nmaa iphe-ẹji ikpe. <sup>4</sup> Iphe, Chileke gude mee iphe ono bu k'ọphu anyi a-dụ ike meẹbekota iphe, pfuru ọto ono, ekemu pfuru ono. Kẹle nta buwaa Unme Chileke bẹ anyi etso; anyi te etsoedu anụ-ẹhu. <sup>5</sup> Kẹle ndu etso anụ-ẹhu buepho g'ẹphe e-me mee iphe, dụ anụ-ẹhu ree bẹ aduje pẹ l'obu. Ndu etso Unme-dụ-Nsọ buru iphe, ọ sụru g'ẹphe mee bẹ ẹphe emeje. <sup>6</sup> Kẹle akpọru obu ye l'eme iphe, dụ anụ-ẹhu ree bukwa ọnwu; akpọkwanuru obu ye l'eme iphe, dụ Unme-dụ-Nsọ ree buru ndzụ waa ẹhu àgù. <sup>7</sup> Noo kẹle akpọru obu ye l'eme iphe, dụ anụ-ẹhu ree bu ọhogu Chileke; kẹle o too tsodu ekemu Chileke; ọphu ọ byadu etso iya. <sup>8</sup> Ọphu ndu emeje iphe, dụ anụ-ẹhu ree 'abyadu adụ ike mee iphe, dụ Chileke ree.

<sup>9</sup> Obenu l'unubedua te emejedu uche unu. Ọ buwaa iphe, Unme-dụ-Nsọ epfu bẹ unu eme; bukwa mẹ ọ -buru-a lẹ Unme kẹ Chileke buphọ ebubu l'ime ẹhu unu. Iphe, bukpo onye enwedu Unme kẹ Kéreshi ono ta abukwa onye nkiya. <sup>10</sup> Teme l'ọ -buru lẹ Kéreshi bu unu ebubu l'ẹhu; bẹ ogwehu unu ta anọkwa ndzụ eme iphe-ẹji; obenu lẹ Unme Chileke buwaa ndzụ l'ẹhu ndu pfuberekoto. <sup>11</sup> Teke ọ bu lẹ Unme kẹ Chileke ono, meru gẹ Jizọsu shi l'ọnwu teta dzuru ndzụ ono, bu l'ime unu; ọo ya bu lẹ yẹbedua ono, meru gẹ Kéreshi Jizọsu shi l'ọnwu teta dzuru ndzụ ono l'e-mekwaphọ g'ẹhu unu ono, bu ọphu a-nwuhu anwuhu ono dzuru ndzụ. Chileke e-shi lẹ Unme-dụ-Nsọ ono, bu unu l'ẹhu ono mee iphe ono.

12 Ọo ya bụ; ụnwunna mu; anyi jikwa ụgwọ, abụdu g'anyi meje iphe, dū anụ-ẹhu ree. 13 Lẹ teke unu eme iphe, dū anụ-ẹhu ree bẹ unu anwuhukwa anwuhu. Obenu teke ọ bụ l'unu shi l'ẹka kẹ Unme-dụ-Nsọ kpagbua umere ono, shi l'anụ-ẹhu unu ono; ọo ya bụ; unu anọdu ndzụ. 14 L'ọ kwa iphe, bụkpoo ndu kweru gẹ Unme-dụ-Nsọ bụru onye a-nọdu edu phẹ nū bụ ụnwu Chileke. 15 Lẹ Unme-dụ-Nsọ, Chileke nūru unu ta abụkwa Unme, e-me g'unu bụru ohu k'ọphu ndzụ a-nọdu agụ unu. Ọchia iphe, unu nataru bụ Unme, e-me g'unu bụru ụnwu kẹ Chileke; anyi shi ẹgube ono arakuje iya sụ: "Abba! Nnana!" 16 Ọ bụru Unme Chileke ono l'onwiya bẹ anọduje agba ekebe l'obu anyi l'anyi bụwaa ụnwu kẹ Chileke. 17 Ọo ya bụ l'ọ -būru-a l'anyi bụwaa ụnwu iya; ọ n'iya bụ l'anyi bụwaa ndu Chileke a-nū iphe, o kweru ụnwu iya ukwe iya. Ọo-nū anyi iphe ono, ọ nūwaru Kéreshi ono. L'ọ -būru-a l'anyi lẹ Kéreshi tūgbaru eje iphe-ẹhuka bẹ Chileke e-mechakwaa mee g'anyi gbaru mgbal'ọdu-biribiri kẹ Kéreshi.

### *Ọdu-biribiri ọphu dū l'iphu*

18 Iphe, doru mu ẹnya bụ l'iphe-ẹhuka ọwana, anyi eje nta-a ta asukpoda nū g'ee-wota iya atụ eyeru ẹgube ọdu-biribiri, Chileke e-mechaa dobe anyi. 19 Iphemiphe, Chileke meru ememe bẹ ọonma anmanma l'ẹhu g'ẹphe hūma teke Chileke e-goshi ụnwu iya l'ọdu-biribiri ono. 20 Kẹle iphemiphe ono, Chileke meru ememe ono bẹ Chileke tūru ọnu g'ọ tūko bụru iphe, laru l'iswi. Ẹbe ọ bụkwa iphemiphe, Chileke

meru ememe meru iphe-ẹji k'onwiya. Ọ kwa iphe, tso ikpe, Chileke nmaru nemadzu ẹ nemadzu mesweru. Ọle Chileke mekwarupho g'iphemiphe ono, o meru ememe ono lekwapho ẹnya <sup>21</sup> l'ujiku lanu be ya a-goshi onu ono, o turu iya su g'o rekashihu ono. Ọogbe teke ono mee g'iphemiphe ta abuhuru ohu iphe-ẹji; g'o bahunchia l'odu-biribiri k'unwu yebe Chileke. <sup>22</sup> Iphe, anyi maru bu l'iphemiphe, Chileke meru ememe l'atsugbaa ude iphe-ehuka ge nwanyi, ime eme; mbukwa byasu nta-a. <sup>23</sup> Ọle o to bulekwaapha kpurumu. Anyibedua l'onwanyi, bu ndu nwewaru Unme Chileke; mbu Unme, Chileke yeru anyi l'ehu gude goshi ẹ ya e-mechaa meeru anyi iphe ono, o kweru anyi ukwe iya ono; l'atsukwapho ude; g'anyi ele ẹnya ge Chileke mee anyi g'anyi buru unwu iya, g'o gbata ogwehu anyi l'ophu. <sup>24</sup> Kele a dzotawaru anyi; o buru iya bu iphe, anyi elekwadu ẹnya teke oo-dzu oke. Kele o -buru ẹ nemadzu natawaru iphe, oole ẹnya iya; ?o lekwadu ẹnya iya ke gunu ozobaa? <sup>25</sup> Teke anyi teke anatadu iphe, anyi ele ẹnya iya; oo ya bu; anyi ata nshi nodunupho ele ẹnya iphe obu.

<sup>26</sup> Nokwapho ge Unme Chileke anoduje eyeru anyi aka; kele ike ta adudu anyi; teme ebe o budu l'anyi maru g'e pfuje anu Chileke g'o gbaru anyi. Ọo ya bu l'oo Unme-du-Nso l'onwiya egudeje atsụ ude ophu buepho yebedua maru iphe, o pfuru epfu anuru anyi Chileke. <sup>27</sup> Ọo Chileke, bu yebedua, l'enyoje ime obu nemadzu be mawaru iphe, bu uche ke Unme-du-Nso; kele Unme-du-Nso anoduje epfu anu Chileke l'iswi

ẹhu ndu-nsọ lẹ g'ọ dọ Chileke ree.

<sup>28</sup> Anyi maru l'iphemiphe, eme l'ẹhu ndu yeru Chileke obu anọduje emekọta g'oo-duru phẹ lẹ ree; mbu ndu Chileke kuru g'ọ tuberu. <sup>29</sup> Kele Chileke mahawaru ndu nkiya teme mgboko dọ; bya ahọtahawaa phẹ g'ephe buru ndu a-dọ gẹ Nwa iya dọ; gẹ Nwa iya ono buru ogerenya me a -gujukwanu unwunna iya l'ophu. <sup>30</sup> Oo ndu Chileke họtahawaru be o kuru. O buru ndu ono, o kuru ono be o guru lẹ ndu pfulerekoto. O buru ndu ono, o guru lẹ ndu pfulerekoto ono be o dobewaru l'odu-biribiri iya.

*N-yemobu Chileke l'ẹhu ndu kẹ Kéreshi*

<sup>31</sup> ?Bụ onu gunu be anyi e-yebaa l'iphemiphe ono nta? O -buru lẹ Chileke agbaru anyi odzori; ?bụ onye sọru g'oo-me anyi gunu? <sup>32</sup> Mbu onye ono te sephuduru Nwa iya azu; obenu l'o gbẹchia duru iya ye g'ọ bya anwuhu-chiru anyi g'anyi ha. ?Bụ egube iphe gunu be o tọ gbẹdu Nwa iya ono l'eka nu anyi kẹ mmanu? <sup>33</sup> ?Bụ onye sọru eku ndu Chileke hotaru ikpe? L'eka o gbẹ buwaru Chileke l'onwiya meru g'ikpe kaleru phẹ. <sup>34</sup> ?Bụ onye be sọru phẹ anma ikpe? Oo kwa Kéreshi Jizosu l'onwiya bu onye gude iswi ẹhu phẹ nwuhu. Ophu o buledaa ono kpeekpu; ophu kachaakponu bu l'o shi l'onwu teta dzuru ndu je anodu l'ekutara Chileke epfu anuru anyi Chileke. <sup>35</sup> ?O dukpooru iphe, sọru akposhi gẹ Kéreshi te eyehẹ anyi obu? ?Bụ eje iphe-ehuka; tọ oke mkpa; tọ mkpawere; tọ egu ememe; tọ ta ahuma iphe, gagbobe l'upfu? ?tọ iphe, alọ ishi onwonye alọ? ?Tọ l'e gbugburu anyi

lẹ mma sūru iya ememe? <sup>36</sup> Ọ dūa g'iphe, e deru sū:

“Ọo l'iswi ẹhu ngu bẹ ọ to  
dudu teke  
onwu ta anọdujedu  
eme g'o gbua anyi  
mbọku-mbọku.

Aanọduje eme anyi g'atūru,  
a chītaru eje egbushi.\*”

<sup>37</sup> Ọ tọ dūkpodaa; noo l'iphemiphe ono e-mekọta; ọle anyi eshije l'ẹka onye ono, yeru anyi obu onoya kakọta iya ike; mekpee ya. <sup>38</sup> L'ọphu doru mu ẹnya bụ l'anwūhu; ọzoo ndzū; ọzoo ndu ojozi-imigwe; ọzoo ndu ọchi-ọha imigwe; ọzoo ndu ọkpehu dū; ọzoo iphe, dū nta; mẹ ọphu e-mechaa dū nū; <sup>39</sup> ọzoo igwe; ọzoo alī; ọzokpoo iphemiphe ọzo, Chileke meru ememe; ta adudu ọphu sūru akpọshi gẹ Chileke te eyehe anyi obu ọphu, o shi l'ẹka Nnajiuphu anyi, bụ Kéreshi Jizọsu yee anyi.

## 9

### *Chileke lẹ ndu ọ hotaru*

<sup>1</sup> Iphe, mu epfu bụ ọkpobe-opfu. Mu bụ onye ke Kéreshi; ẹbe mu adzudu ọka. Unme-dū-Nsọ bu mu ebubu l'ime obu bya emeje g'obu mu marwetaje iphe, gbaru iya nū. Ọ buri obu mu ono meru g'o doo mu ẹnya lẹ mu ta adzudu ọka. <sup>2</sup> Aphū ejije mu obu. Ẹbe ọ dudu teke ọ tọ nọdujedu atsū mu l'ẹhu; k'ọphu oorwujechaa mu l'anū mee <sup>3</sup> Ọduje mu g'a sū lẹ mu bụ onye a

\* **8:36** 8:36 Gūnaa Ebvū 44:22.

turu onu; ophu mu le Kéreshi atugbaeduru; me o -buru l'oo iphe ono a-dzo ndu anyi le phe bu mee lanu; <sup>4</sup> bu iya bu unwu Ízurelu. Epehedua be Chileke hotaru g'ephe buru unwu iya. O buru phe be o goshiru odu-biribiri iya; ephe l'iya nodu l'ogbandzu, ukwe-iphe tso. O goshi phe g'a-abajeru iya eja. <sup>5</sup> Epe bu awa ndiche anyi phe; teme Kéreshi l'onwiya buru eri phe; me a -bya l'abubu, o bu nemadzu. G'e tuje Chileke, kangokotaru iphemiphe epha jasu le tuutuutuu le mijimiimii. Nokwa g'o du.

<sup>6</sup> Su-a; ebe o bukwanu ke g'a su l'iphe ono, Chileke pfuru ono buwaa iphe-mmanu; kele o to bugbabekwa ndu shi le Ízurelu bu okpobe ndu Ízurelu. <sup>7</sup> Ophu g'ephe ha abuebedu okpobe unwu Ebirihamu opfu l'ephe bu awa iya. O kwa g'o duchia baa: "Oo ndu shi l'okpa Áyizaku be bu ndu a-buru unwu ngu kpurumu." <sup>8</sup> Iphe, iphe ono egoshi bu l'o to budu iphe, bu ndu a nwuru anwunwu mmanu be bu unwu Chileke. Oo ndu Chileke kweru Ebirihamu ukwe l'oo-nwuta bu ndu aagu eye l'okpobe unwu Ebirihamu. <sup>9</sup> Le ge Chileke gude kwe Ebirihamu ukwe-iphe ono bu l'o suru iya: "Egube nta apha ozo be mu a-bya agbaphee ngu; Sera anwuta nwa nwoke."

<sup>10</sup> Ebe o buledaa ono kpurumu; unwu Ribeka tukokwa shi le nna lanu, bu Áyizaku, bu iya bu nna anyi ke ndiche. <sup>11</sup> Mbuo teke eteke anwudu unwegirima labo ono; ophu ephe eke emedu iphe, du ree; ozo iphe, du eji be o pfuru opfu ehu phe; k'ophu iphe, Chileke tuseru e-me; le

k'ahota, o hotaru ndu nkiya, l'ebe abụ l'ephe meru ree; ozoo l'ephe meru eji. <sup>12</sup> O bụru iya meru g'o gude a sụ Ribeka: "Oo onye k'ogerenya e-mechaa ejeru onye ke nwata ozi." <sup>13</sup> Bụ iya bụ iphe, e deru sụ: "Jiékoṗu be mu yeru obu; Iso dukwanu mu ashi."

<sup>14</sup> ?Denu g'anyi e-ye iya onu nta? ?Anyi a-sụ le Chileke te emeduru iphe, pfuru oto to? Tuswekwa! <sup>15</sup> Kele o sụru Mosisu: "O -duru onye o du mu ge mu phuru obu-imemini; mu aphuru iya ya. Teke o duru onye o du mu ge mu doberu obu-oma; mu edoberu iya ya." <sup>16</sup> Oo ya bu l'o to budu uche nemadzu; ozoo iphe, eeme l'eka; oo Chileke aphuje obu-imemini. <sup>17</sup> Kele ekwo-opfu Chileke pfukwaru sụ le Chileke sụru Fero: "Iphe, mu gude mee ngu eze ta adukwa iphe ozo, o bu; gbahaa ge mu egude ngu goshi g'ike mu ha; wafua ge ndiphe mgburugburu eshi nno maru onye mu bu." <sup>18</sup> Oo ya bu le Chileke bu onye o du iya g'o phuru obu-imemini be o phuru iya; o nodu akpo-chije obu onye du iya g'o kpo-chia ya.

### *Ehu-eghu me obu-imemini ke Chileke*

<sup>19</sup> Ii-sukwa mu ro: O -buru l'o du egube ono ?buhunu gunu meru g'o gude Chileke nodu anodujekwapho ata nemadzu uta? Chileke -gbetubewaa l'oo owa-a iphe, ya e-me; ?bu onye suru akposhi iphe, Chileke tuberu le ya e-me? <sup>20</sup> Ole gube nwa nemadzu ophu a-sụ l'iphe, Chileke meru ta adudu ree; ?I bu gunu? ?Iphe, a kpuru l'urwa, oojije onye kpuru iya nu sụ: "?O nwuru inwagha be o gude i kpua mu gi kpuru mu-a?"



21 ?Tɔbudu ɔ-kpɔ-ite maru g'oo-me ɔrwa iya? Ɔ -du iya g'o gude uzi ɔrwa lanɔ kpɔa ite labɔ gɛ nanɔ bɔru ite, e meru ɔna; ɔphuu abɔru ite, e meduru ɔna; ?tɔɔ kpɔdu iya?

22 ?Ii-sukwanu agha mɛ ɔ -bɔru l'ɔɔ Chileke eme ɛgube ono? Ɔ dɔru ndu Chileke meru gɛ ya gude goshi oke-ɛhu-eghu iya; waa g'ike iya beru. A makwarɔ-a lɛ ndu ono gbawaru g'o gege egude oke-ɛhu-eghu iya mebyia phɛ; ɔlɛ ɔotaru phɛ nshi shii. 23 Ɔ dukwanuru ndu ɔphu Chileke gude eme gɛ ya goshi l'ɔdu-biribiri iya te nweɔdu ɛtu. Ndu k'ono bɛ ɔ phuru obu-imemini, bu iya bu ndu ono, ɔ tɔbehawaru lɛ yeɛle ɛphe agbaru l'ɔdu-biribiri iya ono. 24 Ɔ bɔru anyibe ndu k'ono, o shi lɛ ndu Jiu mɛ ndu abɔdu ndu Jiu kua ono bɛ ɔ phuru obu-imemini ono. 25 Ɔ bɔru iphe ono bɛ o pfuru l'ɛkwo Hosiya sɔ:

“Ndu eshidu bɔru ndibe mu  
bɛ mu e-mechaa kua  
ndibe mu.

Ɔha ono, mu eshidu yee obu  
ono bɛ mu e-mechaa  
kua ndu mu yeru obu.

26 Tɛmɛ ɔ bɔru l'echilabɔ ɛka  
ono,  
e shi sɔ phɛ l'ɛphe ta  
abɔdu ndu kɛ Chileke  
bɛ aa-nɔdu kua phɛ  
ɔnwu Chileke;  
mbu Chileke nɔ ndzɔ.\*”

27 Tɛmɛ Azáya chikwaaphɔ mkpu ɛhu ndu Ízureɔlu sɔ: “ɔnwu Ízureɔlu -hakkpɔ mɛ obeta

\* 9:26 9:26 Gɔnaa Hos 1:10.

ẹphe je l'aha g'ẹja, kuru l'enyimu; ọ kwapho nwa ndu ọphu abadu ishi be aa-dzota. <sup>28</sup> Noo kele Nnajiuphu e-mekota iphemiphe, o pfuru ndiphe. Oo-mechachaa ya ẹgwegwa; mee ya rengurengu g'oo-du." <sup>29</sup> Ọ dühukwaa g'iphe, Azáya pfuhawaruro teme o mee su: "Ọ to bu le Chipfu, bu Ọkalibe-Kakota-Ike te ekwedu g'awa anyi bvuebe me anyi avu ge Sodomu; mbu me o mee anyi iphe, o meru Gomora."

*Upfu, adu ndu Izurelu l'okpa*

<sup>30</sup> Nta-a ?bu awe be anyi a-subekwanu iya ishi? Ndu ono, abudu ndu Jiu ono, eshidu kukebe ẹhu eme g'a gua phe le ndu pfuberekoto ono; buakwaa ndu pfuberekoto; kele ẹphe kwetaru.

<sup>31</sup> Obenu le ndu Izurelu, bu ndu kukeberu ẹhu eme g'a gua phe le ndu pfuberekoto ono; ta adukwa ike buru ndu pfuberekoto. <sup>32</sup> ?O buru gunu kparu iya? Ọo kele ẹphe te egudedu ekweta cho ya; ọ gbẹ buru iphe, ẹphe gude ike k'eka phe meta; opfu l'ẹphe eme iphe, ekemu pfuru be ẹphe gude cho ya. Ẹphe jenu evukota oke mkpuma ono daa iko. <sup>33</sup> Ọ buru iya bu iphe, e deru su:

"Unu humakpodapho!

Mu woakwaru

mkpuma,

a-nodu adu ndiphe upfu

toḡbo le Zayonu;

mbu mkpuma ẹphe

e-vukota daa iko.

Ọphu onye kweru nkiya

abyadu akwa izimanu.†”

## 10

<sup>1</sup> Ụnwunna mu; iphe, dukpoo mu ree l'obu; teme o buru iphe, mu anoduje epfu anu Chileke g'o meeru iya ndu Izurelu bu g'o mee g'a dzoo phe. <sup>2</sup> L'ophu mu makporu bu l'ophu phe aphuphu l'ehu emeje uche Chileke; ole ephe te egudedu mmamiphe eme iya. <sup>3</sup> L'eshinu ephe amadu k'apfubekoto ophu shi Chileke l'eka; ephe gbẹ achọ apfubekoto k'eka phe; be ephe shi nno jika eworu onwophe dee l'apfubekoto ke Chileke. <sup>4</sup> Le Kereshi meakwaru g'ekemu ta abuhe uzo, Chileke shi agu nemadzu l'onye pfuberekoto; g'iphe, bukpo onye kweru ke Kereshi buru onye Chileke a-gu l'onye pfuberekoto.

### *Ndzota bu ke ndu ke Kereshi*

<sup>5</sup> Wakwa ge Mosisu deru k'apfubekoto ophu shi l'ekemu baa: “Onye eme iphemiphe ono bukwa iya be oo-gude nodu ndzu.” <sup>6</sup> Obenu l'o waa iphe, e deru le k'apfubekoto ophu shi l'ekweta baa: “Ta adukwa teke ii-je arı su: ? Bu onye a-du ike laa l'imigwe.” Mbụ je ekuzeta Kereshi. <sup>7</sup> Ozoo; “? Bu onye l'e-nyiba l'alimaa?” Mbụ je ekufuta Kereshi. <sup>8</sup> ?Bu gunu be eepfukwanu? “Opfu Chileke noakwa ngu ntse. O kwa iya bu opfu, iikpu l'onu; bya aburu iya bu iphe, no ngu l'egomunggo.” Oo ya be bu ozi-oma ono, anyi ezi onoya, bu iya bu opfu k'ekweta-a. <sup>9</sup> Teke o bu l'i gude onu ngu pfua

† 9:33 9:33 Gūnaa Azá 28:16.

ya hoo haa l'ọo Jizọsu bu Nnajiuphu ọbu; bya egude ọkpoma ngu g'ọ ha kweta le Chileke meru iya; o shi l'onwu teta dzuru ndzu; l'a dzoo ngu.

<sup>10</sup> Onye gude obu iya g'ọ ha kweta; Chileke agua ya l'onye pfulerekoto; ọ buru onu be eegudeje pfua ke Kereshi hoo haa; l'adzo onye obu. <sup>11</sup> L'e dekwaru l'ekwo-opfu Chileke su: "Onyemonye, woru onwiya ye iya l'eka be iphere tee mekwa."

<sup>12</sup> Ọ to dwekwa mkpocha, du nu. L'onye pho bu onye Jiu; onye ophuu buru onye Gurisu ta adwekwa; kele ọ buhukwapho Nnajiuphu lanu ono bu Nnajiuphu phe g'ephe ha. Ọ nodu emeru iphe, bukpo ndu epfuje anu iya nu eze-iphe-oma, paru eka apaa. <sup>13</sup> Kele "ọ kwa iphe, bukpo onye l'eku epha Nnajiuphu be aa-dzota."

<sup>14</sup> ?Denu g'ephe e-shikwanu eku epha iya m'ephe ekwetaduru nkiya? Temе ?denu g'ephe e-shi kweta k'onye ephe teke anumaswee nkiya? ?Denukwanu g'ephe e-shi numa iphe, adudu onye pfuru phe iya nu? <sup>15</sup> ?Denukwanu ge ndu-ozima e-shi je ezi ozi-oma; l'ebe abu l'e ziru phe g'ephe je? Ọ buru iya bu iphe, e deru su: "Lenu iphe, okpa phe ama; mbu okpa ndu ezi ozi-oma ke nchi adu doo; teme ephe nodu ezi iphe, du ree." <sup>16</sup> Ole ọ to bubedu g'ephe ha be meru iphe, ozi-oma ono pfuru. Kele Azaya pfukwaru su: "Nnajiuphu ?buhunu onye be kweru kweta iphe, ọ numaru anyi l'onu?" <sup>17</sup> Ọo ya bu l'ekweta shi l'anuma iphe. Iphe, aanuma bukwanuru Opfu Chileke.

<sup>18</sup> Ole ge mu jieshikwa: ?Bu anuma be ephe ta anumaduru ozi-oma obu to? Waawakwa! Ephe numachacharu iya-a!

“A numa-dzukwaru olu phe  
 l'ekameka l'eliphe.  
 Mbụ l'opfu phe ngakotaru  
 eliphe jasụ  
 l'eka igwe beru;  
 alị beru.\*”

19 Mu byakwa ajia sụ: ?Bụ ęnya bę ozi-oma  
 ono eshidu doo ndu Ízurelu ọtọ? Lẹ Mosisu  
 vuhaakwaru ọzo yee ya ọnu sụ:

“Mu e-gude ọha, abụdu  
 ọkpobe ọha  
 meru okophoo ye unu l'ẹhu.

Mu e-gude ọha, eme eswe  
 kpatsu unu ẹhu-eghu.†”

20 Teme Azáya kabakwaa ya rọ epfushi ike sụ:

“Ọ kwa ndu te eshidu acho  
 mu nụ bę humaru mu  
 nụ.

Ọ bụru ndu te eshidu aji aji  
 mu bę mu goshiru  
 onwomu.‡”

21 Ọ byakwanụ l'ẹhu ndu Ízurelu; ọ sụ: “Ọ ọt  
 dudu teke mu ta amachijedu ẹka ęę mu heta  
 ndu ono, bụ ndu kwefuru mu ike ono; mbụ ndu  
 ẹjo-ọkpoma ono; g'ẹphe dakọbe lwaphuta azụ  
 lwapfuta mu.§”

## 11

*Obu-imemini, Chileke aphuru ndu Ízurelu*

\* **10:18** 10:18 Gụnaa Ebvụ 19:4. † **10:19** 10:19 Gụnaa Dit 32:21.

‡ **10:20** 10:20 Gụnaa Azá 65:1. § **10:21** 10:21 Gụnaa Azá 65:2.

<sup>1</sup> Mu byakwa ajia ozo su: ?Bu ajika be Chileke jikawaru ndu nkiya to? Tuswekwa! Mbèdua l'onwomu bukwa-a onye Ízurelu. Mu bu oshilokpa Ébirihamu; bya aburu onye okpa-ipfu Benjiaminu. <sup>2</sup> Chileke ta ajikakwaru ndu nkiya, bu ndu o vuru uzo mahawaru. ? Unu ta amadu iphe, ekwo-opfu Chileke pfuru; mbu ge Elayijia gude chia Chileke ichi ndu Ízurelu su: <sup>3</sup> “Nnajiuphu; ephe tukwakwaru ndu mpfuchiru nkengu gbuèbe; bya enwukpòshia oru-ngweja ngu. O buwaru mbèdua phoduru kpoloko; ephe nodu emekwapho g'ephe gbua mu.” <sup>4</sup> Oe, ?Bukwanu gunu be Chileke pfuru iya? O suru iya: “Mu dobekwaru iphe, ha g'unu nemadzu iri l'èsa l'umadzu ukporo iri, bu ndu teke ewosweeru ikpere gbuaru Balu l'alì.” <sup>5</sup> Nokwapho g'o du nta. O dukwaru-a nwa ndu Chileke gudeepho k'eze-iphe-oma, oome haru hota. <sup>6</sup> Teke o bukwanu l'oo eze-iphe-oma be e gude hota phe; o n'iya-a bu l'o to buedu iphe, e setaru l'akanya; odumeka be eze-iphe-oma ta abukwa eze-iphe-oma. Teke o bukwanu l'oo iphe, e setaru l'akanya; o n'iya-a bu l'o to buedu eze-iphe-oma; odumeka be akanya ta abukwa akanya.

<sup>7</sup> Su-a; ?bu awe be anyi a-subè opfu obu ishi nta-a? O to buèbekwa ndu Ízurelu l'ophu nataru iphe, ephe riru aphu iya; o kwa ndu a hotaru nataru iya. Ndu ophu bukotaru ndu a kpo-chiru okpoma. <sup>8</sup> O buru iya bu iphe, e deru l'ekwo-opfu Chileke su: “Chileke nuakwaru phe maa meru mgbenya nodu erwe

phẹ. Ẹphe te egudeedu ẹn्या aphụ ụzọ; ọphu ẹphe anụmajeedu iphe lẹ nchị byasụ ntanụ-a.”

<sup>9</sup> Teme Dévidi pfukwaaphọ sụ:

“Gẹ nri, ẹphe eri eriri  
bụkwaru phẹ  
ọnyà-enu  
yẹle ọnyà-anụ,  
ẹphe a-nmalahụ.

L'ọ buru ụpfu dị phẹ l'ọkpa;  
g'e gude iya gwata phẹ  
ụgwọ iphe, ẹphe meru.

<sup>10</sup> G'ẹn्या gbahụkwa phẹ ọchii  
g'ọ tọ dị iphe,  
ẹphe a-hụma.

G'apfụ hụfukwa phẹ bụkili  
jasụ l'ojeje.”

<sup>11</sup> Mu byakwa ajia ọzọ sụ: Ọkpa kabẹ tsua ndu Ízurelu ntsụ k'ọphu ẹphe darwuwaru alị; ẹbe ẹphe agbalihubaedu tọ? Tụswekwa! Ọchikwa l'ọkpa, tsuru phẹ ntsụ ono meru g'ọ gude ndzọta rwube ndu ọhoro; g'eeshikwanụ ẹgube ono gẹ ndu Ízurelu awata phẹ ekoru okophoo. <sup>12</sup> L'eshinu ọ bụ emeswe, ndu Jiu mesweru meru g'ọ gude urwu kwata gbaaru ndiphe mgburugburu. Uburu, butaru ndu Jiu mekwaaphọ g'urwu kwata gbaaru ndu abudu ndu Jiu. Mbụ l'urwu a-kwatakwa kabaanụ shii ọkpobe akaka mẹ ndu Ízurelu g'ẹphe ha lwaphuta azụ lwapfuta Chileke.

*Ndzọta kẹ ndu abudu ndu Jiu*

13 Nta-a bukwa unube ndu abudu ndu Jiu be mu epfu eyeru. Su-a; eshinu mu bu onye-ishi-ozu ke ndu abudu ndu Jiu; be mu gudekwa ozi ono eku onwomu. 14 K'ophu bu; g'o duhabe; mu egudeje iya eme ge ndu ali mu ono awataru unu ekoru okophoo; ge mu eshi nno haru phe dzoo. 15 L'o -buru teke ephe jikaru Chileke be Chileke gb'e mee ge yele ndiphe bya adu le ree; ?bu gunu e-mekwanu me Chileke natae phe pho ozo? Ndu nwuhuru anwuhu a-gbeshikwa dzuru ndzu ozo.

16 L'o -buru le mebyi-ipe-mbu ono du nsu; be mkpukorophu iya dukotanaa nsu. O -buru l'ogbarabvu-oshi du nsu be ekali iya l'ophu dukotaakwapho nsu.

17 Su-a; ndu Jiu du g'oshi olivu unuphu, a haru ekali iya kwashia. Unubedua, abudu ndu Jiu buru ekali-oshi olivu egu, e wotaru bya edepfube l'eka a kwafuru ekali k'unuphu pho. E depfube iya; o dzuru ndzu. Nta-a be unu shiwa l'ogbarabvu olivu unuphu pho amitaje mini gude nodu ndzu. 18 Oo ya bu le-a; te ejekwa asu l'o to dudu iphe, ekali iya ophu a kwashiru pho bu. ?Bu ke gunu be ii-gude eku onwongu? Nyatakwa l'o to budu ngu gudeshi ogbarabvu-oshi ono; l'o chia ogbarabvu-oshi ono gudeshi ngu.

19 Ii-gbenu su: "A kwafuakwaru ekali-oshi ono; g'e depfube mbedua." 20 Ole makwaru l'ipe, kparu iphe, e gude kwashia ya bukwa l'o to woduru onwiya ye Kereshi l'eka. Gubedua nyikatakwanu pfuru pfushia ike; kele i kwetaru. Oo ya bu le-a; te etsenupho etsetse; ge ndzu gujekwa ngu. 21 Eshinu Chileke ahaduru



okpobe ekali-oshi ono ke mmanu; ? bu-chia gubedua be oo-ha ke mmanu? <sup>22</sup> Nowarọ g'ii-gude huma le Chileke emeje odoo; humakwapho l'oomeje nemadzụ iphe kpangangaa. O meru ndu jikaru iya nu iphe kpangangaa. O mekwanaaru gubedua odoo; mbukwa me o -buru l'i kweru nopyabe l'odoo obu, oomeru ngu; odumeka be o kwafujekwa ngu pho. <sup>23</sup> Teke o bu le ndu ke Jiu jika-buhuru eze-iphe-oma ke Chileke be Chileke e-wolekwaru phe-a dopu azu l'eka ephe shi nodu; kele Chileke a-dukwaa ike dopu phe azu l'eka ephe shi nodu. <sup>24</sup> Oo ya bu le-a; o -buru l'a kwafuru ngu l'oshi olivuegu ono; bya eworu ngu depfube l'oshi olivunuphu pho; mbu o buru iphe, e meru g'e te emejedu iphe; ndu owa-a, bukwanu phe bu ekali-oshi olivunuphu ono gedegede be ookabakanu Chileke nphe eworu ekali iya, o shi kwafu akwafu pho woru depfube l'oshi, ekali iya ono shi nodu.

*Obu-imemini Chileke l'ehu onyemonye*

<sup>25</sup> Unwunna mu; o nweru okpobe-opfu, e domiru edomi, mu eme g'unu maru; g'unu ete ejejedu ari l'unu manukawaru iphe. Iphe, unu a-maru bu le-a; o to bukwa ge ndu Izurelu bu ejo-okpoma nta-a bu g'ephe a-duwaro jeaduru. Teke ejo-okpoma phe ono a-no-beru bukwa teke ndu abudu ndu Jiu, Chileke hotaru l'a-tukowa lwaphutawa azu byapfuta iya. <sup>26</sup> Oo ya bu; teke ono; aa-tuko iphe, bu Izurelu mgburugburu dzoo, bu iya bu iphe, e deru l'ekwo-opfu Chileke su:

“Onye-Ndzọta e-shi lẹ Zayọnu  
bya.

Ọo-tụko ẹjo ememe,  
unwu Jiékọpu  
shi eme wofukọta phẹ  
l'ẹhu.

<sup>27</sup> ‘Kẹle ọwa-a bukwa ọgbandzu,  
e-shi mu l'ẹka laaru  
phẹ teke ono,  
mu a-gukotaru phẹ nvu  
l'iphe-ẹji,  
ẹphe mekọtaru ono.\*’ ”

<sup>28</sup> A -bya lẹ k'ozì-ọma ono bẹ ọ gbẹkwa buru iphe kweru unu l'ẹphe bụ ọhogu Chileke. Obenu l'a -bya lẹ k'ahọta, Chileke họtaru ndu Jiu bẹ ẹphe bukwanu ndu Chileke yeru obu l'opfu ẹhu ndiche anyi phẹ. <sup>29</sup> Lẹ Chileke ta agbanwejekwa iphe, ọ rihawaru k'ememe l'ẹhu ndu ọ họtaru g'ẹphe buru ndu nkiya. <sup>30</sup> L'unubẹ ndu abudu ndu Jiu shi buru ndu te kwejedu eme iphe, Chileke pfuru; obenu lẹ nta-a bẹ Chileke phuru unu obu-imemini opfu lẹ ndu Jiu te ekwejedu eme iphe, o pfuru. <sup>31</sup> Nokwaphọ g'ọ dụ ndu Jiu bụ ono. Nta-a bẹ ẹphe te ekwekwaphọ eme iphe, Chileke pfuru g'ee-shi gẹ Chileke aphọaru phẹ obu-imemini g'ọ phuru unu. <sup>32</sup> Ọo ya bụ lẹ Chileke haru onyemonye ọzo g'ẹphe te ekweshi eme iphe, o pfuru gẹ ya a-phọaru onyemonye obu-imemini.

### *Ọdu-biribiri Chileke*

---

\* **11:27** 11:27 Gọnaa Azá 27:9.

<sup>33</sup> Ha-oo! nkwaṁnya yeḽe mmamiphe ke Chileke pakwaru omilomi. Ikpe, ookpeje ta adukwa onye suru iya amaḽberu; ebe o dukwa onye suru amakotaru g'o meje iphe iya. <sup>34</sup> "ʔBu onye maru uche Nnajiuphu? ʔBu onye egoshije iya iphe, oonoduje eme? <sup>35</sup> ʔBu onye nujeru iya iphe; k'ophu oosuru g'o p'ukwaa ya ugwo iphe iya?" <sup>36</sup> Oo ya meru iphemiphe. O buru iya be iphemiphe shi l'eka iya du; o bukwaru iya pho be iphemiphe, du du-doru. G'ajaja buru ke Chileke jasuru le tuutuutu le mimiimii. Nokwa g'o du.

## 12

### *Adzuru nduru je ozi Chileke*

<sup>1</sup> Oo ya bu; unwunna mu; eshinu Chileke aphuru anyi obu-imemini nno be mu arwo unu suru g'unu woru onwunu nu Chileke okpobe anunu; unu buru iphe, duru nduru, unu gude gweeru Chileke ngweja, du nsoro bya aburu ophu Chileke nataru. Noo iphe, bu okpobe abaru Chileke eja bu onoya, bu iphe, gbaru iya nu. <sup>2</sup> Unu te ekwekwa eme g'unwueliphe anoduje eme. Iphe, unu e-mechia bu g'unu haaru Chileke onwunu g'o buru iya l'anoduje agbanwe obu unu; g'uche unu buru iphe ophuu g'unu a-duje ike maru iphe, bu uche Chileke, bu iya bu iphe, du iya ree; buru iphe, o nataru bya aburu iphe, debebe ree.

<sup>3</sup> Iphe, mu gude epfuru unu iphe-a, mu abya epfufu-a bukwa le Chileke mewaru mu eze-ipe-oma; mu nodu epfuru iya unu g'unu ha suru g'unu ta ariekwaru onwunu g'unu ahadu.

Ọ chia iphe, unu e-meje bu g'unu deje ẹnya lẹ mini maru iphe, unu ari. Chileke hẹwaru onyemonye oke iphe-oma, shi l'ekwekwe, onye kweru nkiya. Noo iphe, e-goshije onyemonye iphe, ọo-nọdu ari ru onwiya bu ono. <sup>4</sup> L'ọ kwa g'ọ du l'ẹhu nemadzu bu ono; l'ogwehu lanu enwejekwaru mpfukashi, du igwerigwe; mbu ẹphe nọdu atukoje emegbaa iphe, du iche iche. <sup>5</sup> Nokwapho g'anyi du igwerigwe; ọle anyi shiwaa l'atugba, anyi lẹ Kéreshi tugbaru buru ogwehu lanu. Onyenonu l'oome ge yele nwibe iya dogba ẹhu. <sup>6</sup> Anyi nwegbaaru iphe-oma, Chileke meru nu anyi l'ẹhu l'ẹhu; onye g'eze-iphe-oma nkiya ha. Nta-a bu g'anyi gudeje iya mee iphe, g'ọ gbaru. Ọ buru mpfuchiru, g'onye ono pfujekwa iya g'o goshiru iya ya l'ekwekwe, o kweru. <sup>7</sup> Teke ọ bu onye Chileke meru iphe-oma k'eje ozi; g'onye obu yeru ẹhu l'eje ozi. Teke ọ bu ezi iphe; g'onye obu zijekwa iphe. <sup>8</sup> Teke ọ bu adu obu; g'onye obu nọduekwapho l'adu nemadzu obu. Teke ọ bu l'anu iphe; g'onye ono sajekwa ẹka asasa nu iya. G'onye nọ l'ishi kukebejekwa ẹhu jeshi ozi ike; g'onye aphu obu-imemini phujekwa iya l'ẹhu-utso.

### *N-yemobu*

<sup>9</sup> Ge n-yemobu i yeru nemadzu ta abukwaru l'eregede. Kpajeru iphe-ẹji l'aphara; gudeshia ẹka l'eme iphe, du ree. <sup>10</sup> G'onyenonu yeje nwibe iya obu mebyi eyeye gude goshi l'unu tukoru buru unwunna lanu. G'onyenonu kajakwa akwabẹ nwibe iya ubvu eme l'onwiya.

<sup>11</sup> Jeshijekwa ozi ike; te emejekwa ɛnyiru. Hakwaa gɛ Unme-du-Nsɔ meje ngu ire l'ɛhu; shi ɛgube ono mee g'ejeru Nnajiuphu ozi e-vuje ngu evuvu l'obu. <sup>12</sup> G'iphe ono, unu ele ɛnya iya ono meje g'ɛhu tsɔ unu ɛtso. Unu atakwaphɔ nshi mɛ unu -nɔdu eje iphe-ɛhuka. Unu epfu anɔ Chileke mkpɔrumkpuru. <sup>13</sup> Unu yejeru nwibe unu, unu l'ɛphe tɔkoru buru ndu kɛ Chileke ɛka lɛ mkpa, duru phɛ nɔ. Unu ekukebeje ɛhu kwaa ɛbyaa, byaru unu.

<sup>14</sup> Unu gojeru ɔnu-ɔma nɔ ndu eme unu mkpawere. Mbɔ-a unu gojekwa ɔnu-ɔma; unu ta atujekwa nemadzɔ ɔnu. <sup>15</sup> Ndu ɔzo -nɔdu ete ɛswa; unu tsojekwarɔ phɛ tee ɛswa; ndu ɔzo -nɔdu ara ɛkwa; unu tsokwaru phɛ raa ɛkwa. <sup>16</sup> G'uche unu lɛ nwibe unu bujekwaru nanɔ. Unu te edobejekwa onwunu g'unu ahadu. ɔ chia iphe, unu e-meje bu g'unu lɛ ndu ɛnya lwarɔ megbajɛ. Unu ta abujekwaru nwɔmaru-ɔ-machata.

<sup>17</sup> Unu te egudejekwa ɛjo-iphe pɛɔa nemadzɔ ɔgwɔ ɛjo-iphe, o meru unu; gbahaa g'unu kukebeje ɛhu meje iphe, onyemonye a-maru l'ɔo iphe, du ree. <sup>18</sup> Unu kukebe ɛhu seje g'unu l'onyemonye nɔdu lɛ nchi-odoo; l'iphemiphe, unu eme; mɛ oo-je l'ekwe ememe. <sup>19</sup> Ndu mu yeru obu; unu te emelatajekwa ɔgwɔ iphe, e meru unu. Unu hajekwa gɛ Chileke gude oke-ɛhu-eghu iya melata onye ono. L'e dekwaru l'ɛkwo-opfu Chileke sɔ: "Emelata bukwa mu bɛ ɔ duru; ɔ buru mu l'a-pɛɔ ɔgwɔ." Noo iphe, Nnajiuphu eepfu. <sup>20</sup> ɔ chia iphe ii-meje bu: "ɔ -buru l'onye opfu ngu bɛ ɛgu agɔ; nɔ iya nri.

Teke ẹgu mini agù iya; kee ya mini g'o ngua; lẹ ị -nọdu eme nno bẹ ị kpọberu iya icheku-ọku l'ishi." <sup>21</sup> Te ekwejekwa g'ẹjo-iphe mekpee ngu; gudejehia iphe-oma mekpeje ẹjo-iphe.

## 13

### *Akwabẹ ndu-ishi ùbvù*

<sup>1</sup> G'on'yemonye mejekwa iphe, ndu-ishi phẹ sùru g'e meje. L'ọ tọ dukwa onye byaru aburu ishi me ọ -budu l'o shi l'ẹka Chileke; tẹme ọ buru Chileke bẹ yeru ndu ọphu bu iya nu nta-a.

<sup>2</sup> L'onye jikaru eme iphe, ndu-ishi pfuru bukwa ndu-ishi, Chileke yeru bẹ onye ono jikaru. Ndu ajikakwanu phẹ nu buru ikpe bẹ ẹphe esekọ ekpu onwophe l'ishi. <sup>3</sup> Lẹ ndu eme iphe, du ree ta atsujekwa ndu-ishi ebvu. Ndu atsù ndu-ishi ebvu bukwa ndu eme ẹjo-iphe. Teke ọ bu l'ọ du ngu g'i b'atsujeshi ndu-ishi ebvu; ọ n'iya bu g'i meje iphe, du ree g'onye-ishi ajaa ngu ajaja.

<sup>4</sup> Kẹle onye-ishi ono bukwa onye-ozì Chileke; iphe, oome buru iphe, a-duru ngu lẹ ree. Ọle teke i mekwanuru iphe, adudu ree; tsukwaa ya ebvu; kẹle e te eyekwaru iya kẹ mmanu. Ọ bu onye-ozì Chileke; buru onye ahù ndu eme ẹjo-iphe ahùhù gude egoshi oke-ẹhu-eghu kẹ Chileke. <sup>5</sup> Noo g'o gude unu je l'emeje iphe, ndu-ishi pfuru; ọ tọ buledaa g'unu agbalaaru oke-ẹhu-eghu Chileke; obenu l'ọ bufukwaapho g'unu meje iphe, obu ta anmadu unu ikpe.

<sup>6</sup> Nokwapho iphe, meru g'o gude unu je apfufe akiriko. Noo kẹle ndu-ishi ono bu Chileke bẹ ẹphe ejeru ozi; ẹphe nọdu anọduje eme g'ẹphe

jee ya g'ọ gbaru. <sup>7</sup> Unu mejeru p̄he iphe, rwuberu p̄he n̄. Onye o rwuberu l'at̄uru ak̄iriko n̄; unu at̄uru iya n̄ iya; onye o rwuberu l'at̄uru ̄tu n̄; unu at̄uru ̄tu n̄ iya; onye ọ gbaru l'eyeru ns̄; unu eyejeru iya ns̄; onye ọ gbaru l'akwabe ̄bv̄; unu akwabe iya ̄bv̄. Unu mejeru onyemonye iphe, rwuberu iya n̄.

*Eye nemad̄u ibe ngu obu*

<sup>8</sup> G'ọ t̄ dukwa ̄gw̄o, unu e-jijeru nemad̄u; gbahaa ̄gw̄o n-yemobu. Kele onye yeru nwibe iya obu mek̄otaakwaru iphe, ekemu suru g'e meje. <sup>9</sup> Kele iphe, buk̄poo ekemu-a g'ọ hak̄otakpoo, bu iya bu; te erikwa ogori; ọphu i gbukwa ọchi; ọphu i zikwa iphuru; ọphu iphe, onye ọzo agujekwa ngu; m̄waro ̄nwu ekemu ọzo, yiḡbaa ya n̄. Ekemu ono g'ọ hak̄otakpoo jeru as̄be ishi l̄: "Yee nemad̄u ibe ngu obu g'i yeru onwongu." <sup>10</sup> Onye yeru nemad̄u ibiya obu te emejekwa iya ẹjo-iphe. Noo g'ọ gude n-yemobu b̄ru emēbe iphe, ekemu pfuru.

*Akwak̄obe k'abyabya K̄reshi*

<sup>11</sup> S̄-a; iphe mef̄aru g'ọ gude unu je at̄koje iphemiphe ono eme bu ḡ nta-a gbaru; mb̄ l'o r̄wuaru teke unu e-shi l̄ mḡnya tehu. Noo kele nta b̄ ndz̄ta anyi kawaa ntse eme l̄ g'ọ shi d̄-be ̄nya m̄ a -gb̄ l̄ teke anyi beberu kweta k̄ K̄reshi. <sup>12</sup> Ọ dukwaa ̄nya abal̄ keru ẹbo; nchi ab̄hu dukwaa ntse. Ọo ya bu; unu g'anyi gw̄obenu iphe, eeme l'ọchii; kwaa onwanyi ngw̄ogu ọphu anyi e-gude al̄w̄ ọgu l'iph̄ró. <sup>13</sup> G'anyi meje ọkpobe umere, eme l'iph̄ró; anyi ahaa eme k̄ nwanyi ọzoo k̄

nwoke; haa angunuka mee. Anyi ahakwaapho emephe opfu; haa iji-enya. <sup>14</sup> O chia iphe, unu e-meje bu g'unu tukokpoepho umere Nnajiuphu, bu Jizosu Kereshi meje g'oha. Unu ta ahakwaru obu egube nemadzu, unu shi buru uzo; mbu k'ophu unu e-mejeepho ejo-iphe agu iya nu.

## 14

### *Anma nemadzu ikpe l'egomunggo*

<sup>1</sup> Onye ekwekwe iya du nyegenyeye; unu hajekwa iya g'unu l'iya nodu. O l'oo g'unu l'iya te ejejekwa atu ego l'iphe, o suru l'oo owa-a g'o du iya bu owa. <sup>2</sup> O duru ndu adudu iphe, ephe aso nsu eriri; o bekwanu l'onye ophuu, ekwekwe iya dukwadu nyegenyeye pho buepho iphe, oorije bu eba-ophe. <sup>3</sup> Oo ya bu; g'onye ono, ta adudu iphe, oso nsu pho ta akpokwanu onye ophuu ebo l'afu l'o to ridu ge ya eri. Noo kele Chileke nataakwarupho yebedua. <sup>4</sup> ?I bu gunu? ke g'o buru onye ejeru onye ozo ozi be ii-nodu agbarwushi. Oo Nnajiuphu iya be anma iya ikpe l'oome eji; ozoo l'osusu l'oome ree. O bekwanu l'oo-nodu eme ree; kele Nnajiuphu suru g'oo-me iya g'o me ree.

<sup>5</sup> O nweru onye a-hota eswe ujiku lanu dobe l'oo eswe ono kakota ndu ophuu mkpa; nweru onye a-ri su l'eswe ta adudu ophu ka nwibe iya mkpa. G'onyenonu pferupho l'ophu o pfuru pfushia ya ike. <sup>6</sup> Onye riru l'o nweru mboku ophu ka nwibe iya mkpa dobe iya iche; l'eme iya gude akwabe Nnajiuphu ubvu. Onye adudu mboku, duru iya le nsu bukwarupho Chileke be



oomeru iya. Onye adudu iphe, ooso nsọ eriri l'eri iya gude akwabe Nnajiuphu ùbvù. Noo kele ookeleje Chileke ekele iya. Onye asọ iphemiphe nsọ buru Nnajiuphu be oosoru iphemiphe nsọ; teme o nọdu ekeleje Chileke ekele iya. <sup>7</sup> O tọ dukwa g'anyi ha; onye nọ ndzụ nọ-doru onwiya; ophu o dukwa onye anwuhu anwuhu anwuhudoru onwiya. <sup>8</sup> Anyi -dzuru ndzụ; bu Nnajiuphu be anyi dzuru iya; teke anyi anwuhu anwuhu; o kwapho Nnajiuphu be anyi anwuhu alapfu. Oo ya bu l'anyi bu ke Nnajiuphu: me anyi nọ ndzụ; me anyi anwuhu anwuhu. <sup>9</sup> Kele Kéreshi nwuhuchaaru bya adzuru ndzụ ozo g'oo-buru Nnajiuphu ndu nwuhuru anwuhu; me ke ndu dzụ ndzụ. <sup>10</sup> Sụ-a; ?denu g'o gude i nọdu agbarwushi nwanna ngu l'ime obu ngu? Ozoo; ?o meru imagha be o gude i nọdu akpo iya ebo l'afu? ?Ti madu le g'anyi ha l'e-mechaa pfukotaruru l'iphu Chileke; onye bu iya l'e-kpekota anyi ikpe? <sup>11</sup> Noo l'e deru l'ekwo-opfu Chileke sụ: “ ‘Eshinu mu dzụ ndzụ’;

be onyemonye  
e-mechakwaa gbuaru mu  
ikpere l'ali.

Nokwa iphe, Chipfu eepfu.

Onyemonye e-mechaa  
pfukota l'oo mu bu  
Chileke.\*”

<sup>12</sup> Oo ya bu le g'anyi ha l'onye l'onye l'e-emecha nọdu l'iphu Chileke; doo edo onwiya.

*Akwatsu nwibe ngu*

\* **14:11** 14:11 Gūnaa Azá 45:23.

13 Ọo ya bu; g'anyi ta anọdujeshinu ag-barwushi nwibe anyi. Ọ chia g'anyi tuko tubua g'anyi ta abujeru upfu du nwanna anyi l'okpa; ozoo meta iphe, e-me g'o mee iphe-eji. 14 Eshinu mu le Nnajiuphu, bu Jizosu tugbaru buru nanu be ophu dokporu mu enya okpobe edodo bu l'o to dudu iphe, eeri eriri, mu asokwadu nsọ. Ọle teke o bu l'o nweru onye pfuru su l'iphe, du egube-a be ya aso nsọ; oo ya bu; iphe ono a-buru iphe, aaso nsọ l'ehu onye ono kwa. 15 Teke o bu l'i gude k'iphe, iiri l'onu mee nwanna ngu; k'ophu ehvuduru iya ebvuru; oo ya bu l'i ti mehedu iphe, egoshi l'i yeru iya obu. Ọo ya bu; g'iphe, iiri l'onu ta akpatakwa ge nwanna ono, Kereshi nwuhu-chiru onwu ono laa l'iswi. 16 Te ekwekwa g'iphe, du ree, iime vuta ejo epha. 17 L'iphe, bu le Chileke bu eze ta abukwa l'iphe, eeri l'onu; ozoo l'iphe, aangụ angungu. Ọ kwa apfubekoto; yele nchi-adu-doo; waa ehutso ophu shi l'eka Unme-du-Nso. 18 Onye ejeru Kereshi ozi egube ono eme iphe, jiru Chileke epho; bya emekwapho iphe, du ndiphe ree.

19 Ọo ya bu; g'anyi tubeepfo nvo l'iphe ono, emeje ge nchi du doo onoya; mbu iphe ono, l'anodu eme ge nwibe ngu pfushia ike l'ekwekwe, o kweru ke Chileke ono. 20 Te egudekwa k'iphe, iiri l'onu mebyia iphe, Chileke eme. Iphemiphe, eeri eriri, debekwa ree. Ọle o to gbaduru ge nemadzu ria iphe, a-kpata ge nwibe iya mee eji. 21 Ọ kakwa ree g'i ti tashi anu; ophu i ngushi mee; ophu o dukpoo iphe, ii-je ememe, bu iphe, a-buru upfu du nwanna ngu l'okpa mee ya g'o daa; ozoo mee ya g'o du nyegenyege. 22 G'iphe,

bukpoo iphe, i kweru bukwarupho iphe, duru gu le Chileke. Onye ehu atsọ utso bukwa onye meru iphe, o riru l'ọ du ree ememe; ebe o dudu teke obu anma iya ikpe l'iphe, o meru. <sup>23</sup> Obenu l'onye abo obu ebo be ikpe nmakwaru me o - ria iphe obu; kele o to nodu Chileke l'eka eme iphe, oome. Kele iphemiphe, nemadzu eme; ebe o nodu Chileke l'eka eme iya bukwaa ya eme iphe-aji.

## 15

### *Etso eka Jizosu Kereshi*

<sup>1</sup> Anyibe ndu shihuru ike; l'a-noduje ata nshi l'iphe, ndu eshihuduru ike eme. G'anyi te emejeekwapho ehu anyi ehu anyi. <sup>2</sup> Onyenonu g'anyi ha meje iphe, a-tsọ nwibe iya utso; l'ọ buru iphe, ee-gude kutsee ya. Oo ya bu; g'obu akabakwanaa ya eshihu ike l'iphe, ke Chileke. <sup>3</sup> Le Kereshi ta abukwa ehu iya ehu iya be o shi emeje. Iphe, meru nu buepho iphe ono, e deru su: "Iphe, bukpoo ejo-opfu, ndu epfuru ngu ejo-opfu pfuru ngu bu mbedua vutaru onwu iya." <sup>4</sup> L'iphemiphe, e dekotaru teke ndiche be e dekwaru g'o zia anyi iphe. Oduje anyi obu g'anyi aduje ike taa nshi nodu ele enya iphe, Chileke kweru anyi ukwe iya. <sup>5</sup> Ge Chileke ono, bu iya emeje g'anyi taju iphe nshi; bya aduje anyi obu ono mee g'unu gude etso eka Kereshi Jizosu g'obu buru unu nanu. <sup>6</sup> Oo ya bu; g'unu atuko g'unu ha tugba; gude obu lanu; gudekwapho olu lanu aja Chileke ajaja; mbu

Chileke, bu iya bu Nna ke Nnajiuphu anyi, bu Jizosu Kéreshi.

*Ozi-oma bu ke ndiphe mgburugburu*

<sup>7</sup> Oo ya bu; unu gudeje obu unu haa g'unu le nwibe unu tugba; ge Kéreshi hakwarupho; unu l'iya tugba; noo ya bu g'aa-jakwanaa Chileke ajaja. <sup>8</sup> L'iphe, mu epfu bu le Kéreshi byaru bya aburu onye-ozu ndu buru úbvù; g'o mee g'iphe ono, Chileke kweru ndiche anyi phe ukwe iya pho vukota. Oo ya bu; g'oo-shi nno goshi le Chileke bu onye ire-lanu, emeje iphe, o pfuru. <sup>9</sup> Wafua ge ndu abudu ndu Jiu ajaa Chileke ajaja l'o phunukaru phe obu-imemini, bu iya bu iphe, e deru su: "Oo ya meru g'o gude mu je l'etu ngu epha l'echilabò ndu abudu ndu Jiu. Mu e-gude epha ngu gua ebvu jaa ngu ajaja." <sup>10</sup> Tem e dekwaapho su: "Unube ndu abudu ndu Jiu; unu le ndu Chileke hotaru tuko tee eswa!" <sup>11</sup> Ozo buru: "Unu tua Chileke epha; unube ndu abudu ndu Jiu g'unu ha. Ndiphe mgburugburu; unu tua ya epha!" <sup>12</sup> Tem Azaya byakwapho bya epfua su: "Oshilokpa Jiesi l'a-bya! Oo ya e-tsefuta bya aburu eze k'iphe, bu ndu bu ndu abudu ndu Jiu. O buru iya bu onye ephe a-nodu ele enya iya." <sup>13</sup> Ge Chileke, onye bu iya emeje g'anyi lee enya iphe, o kweru ukwe iya; mee g'ehu-utso unu dzua oke; l'oomekwaapho g'ehu debe unu guu g'unu ha; kele unu kweru nkiya. Oo ya bu; g'unu egude ike ke Unme-du-Nso kabakpo ele enya iphe ono, Chileke kweru ukwe iya ono.

*Iphe, kpataru Polu ede  
ekwo-ozu-a egube-a*

14 Unwunna mu; unubedua be mu maakwaru majia enya; l'iphe, unu maru buepho eme iphe, du ree; l'unu maru iphe, bu uche Chileke okpobe amaru; k'ophu unu suru g'unu a-nodu akpoziru nwibe unu uzo. 15 O le g'o duhabe; o nwekwarupho nwiphe, mu eme ge mu haru nyatachaaru unu; o buru iya meru g'o gude mu haru pfua iphe ono pfushia ya ike; mbu ophu mu atsudu ebvu; kele Chileke mewaru mu ezeiphe-oma. 16 O mewaru mu; mu buru onye-ozu Kereshi Jizosu; ge mu je ezia ndu abudu ndu Jiu ozi; mu eje ozi, gbaru onye uke Chileke l'ezi ozi-oma ono, shi l'eka Chileke onoya. Oo ya bu ge Chileke anatakwanu ngweja ndu abudu ndu Jiu. L'o buru iphe, Unme-du-Nso e-me g'o buru iphe, e doberu Chileke iche. 17 Oo ya bu le mu a-nodu etukpo onwomu epha ozi, mu ejeru Chileke; eshinu mu le Kereshi tugbawaru buru nanu. 18 O to dukwa iphe, mu atu ama epfupfu, abudu iphe ono, Kereshi gbem mu l'eka mee ono, bu iya bu l'o meru ge ndu abudu ndu Jiu kweta bya aburu ndu emeje iphe, Chileke pfuru. Iphe ono be Kereshi gude opfu onu mu; me iphe, mu eme ememe; mee o du egube ono. 19 O gudekwapho ike k'eme ohumalenya, dugbaa biribiri; me ike ke Unme-du-Nso gude mee ya. Oo ya bu; e shi egube ono mu nodu asaje ozi-oma ke Kereshi ono g'o gbaru l'ekameka; e -shi le Jierusalemu jasu mu rwua Ilirikumu. 20 O buerupho iphe lanu, anoduje evu mu evuvu l'obu bu eje epfu opfu Chileke; ole o to bukwa ge mu je iya epfupfu l'eka a mahawaru ke Kereshi; ge mu ta agbe gbeshi je akpuahaa ulo l'eli okpa ulo, onye ozo

tuhawaru. <sup>21</sup> O dua g'iphe, e deru l'ekwo-opfu Chileke su:

“Ndu e teke pfusweeru nkiya  
l'a-huma l'anya.

Ndu e teke anuma-swee nkiya be ke nkiya ono  
e-do anya.”

*Polu e-je g'ephe le ndu Romu kwee*

<sup>22</sup> Oo iphe ono meru g'o gude o nweru iphe, kposhichawaru mu ugbo olemole ge mu ta abya agbaphee unu. <sup>23</sup> Obenu le nta-a be eshinu mu jeebewaru iphe, gbaru mu l'ejeje l'uswe iya owa; teme mu nowaa apha olemole, mu shi meta ge mu e-me ge mu bya ge mu l'unu kwee; <sup>24</sup> be mu arikuwa le mu e-megha iya nta. Mu ari le mu a-bata me mu -jejeepho Supenu. Mu l'unu kpochaa nwupfu nwanshi g'obu shihu mu ike; unu eduwa mu ro ije; ge mu jeshia aka ono. <sup>25</sup> O -buru ke nta-a bukwa ndu ke Chileke no le Jierusalemu be mu gude iphe ewojeru g'ephe mee aka atsuh phe l'ehu. <sup>26</sup> Le ndu ke Kereshi le Masedoniya; me ndu ke Akaya be chiru idzu; tua iphe g'a nu ndu-nsu le Jierusalemu; ndu ophu adudu g'o du phe. <sup>27</sup> Epe tukpooru obu phe onyo nu iphe ono. Teme e -jejekpo ya epfufu be unu maru l'o duwaa g'ugwo; epe jiru iya ndu ke Chileke le Jierusalemu; le teke o bu le ndu abudu ndu Jiu be epe le ndu ophu bu ndu Jiu gba mgba l'iphe-oma, shi Unme-du-nsu ono, Kereshi meru nu ndu Jiu onoya l'aka; oo ya bu l'o gbaru g'ephe gudeje eku ophu epe kpataru gude yeru ndu Jiu ono aka. <sup>28</sup> Teke mu jechaerupho ozi onoya; nuchae phe pho okpoga

ono, a tɔtaru onoya l'oo-buru mu eje Supenu; mu e-shiwaro bata teke onoya. <sup>29</sup> Ophu mu maru bu le teke mu byaru be mu e-me g'iphe-oma, shi Kereshi l'eka dzua unu oke l'eka.

<sup>30</sup> Unwunna mu; mu arwo unu su g'unu gude k'iswi ehu Nnajiuphu anyi, bu Jizosu Kereshi waa k'eye obu ophu shi Unme-du-Nso l'eka lwubude mu ogo ono. Unu pfuje opfu ehu mu nu Chileke. <sup>31</sup> Ge Chileke te ekwekwa ge ndu jikaru ozi-oma ono l'ali Jiudiya furu mu l'uzo; yefua g'iphe, mu gude eje dukwapho ndu-nso le Jierusalemu ree anata. <sup>32</sup> Oo ya bu; o -buru uche Chileke; mu egude ehu-utso byapfuta unu g'anyi l'unu nota; k'ophu oo-buwaruro mu l'unu atuta unme. <sup>33</sup> Ge Chileke ono, emeje ge nchi du doo ono swikwaru unu eswiru g'unu ha. Nokwa g'o du.

## 16

### *Polu ekelegbaa ndu o maru l'ehu l'ehu*

<sup>1</sup> Mu eme g'unu maru nwanna anyi nwanyi, bu Fibi; onye l'ejeru Chiochi, no le Kenkiriya ozi.

<sup>2</sup> Unu gude iswi ehu Nnajiuphu anyi nata iya okpobe anata g'o gbaru ndu-nso l'ememe; unu eyejeru iya eka l'iphe, bukpo iphe, mkpa iya duru iya l'echilabo unu; l'o yekpoakwaru ikpoto nemadzu eka; mekpoo mbedua l'ishi onwomu.

<sup>3</sup> Unu keleru mu Pisisila yee Akwila; ndu anyi l'ephe tukoru ejeru Kereshi Jizosu ozi; <sup>4</sup> ndu gude iswi ehu mu lo ishi phe alo. O to bulekwa mu-a l'ekele phe nwekinyi mu k'iphe, ephe meru mu. Iphe, bukotakpo Chiochi, no

l'ali ndu abudu ndu Jiu mgburugburu l'ekelekwaphẹ phọ. <sup>5</sup> Nokwaphọ g'unu e-keleru mu Chiochi ono, edzukoje l'ibe phẹ ono.

Unu kelekwaru mu phọ Epenitosu; ọkpobe ọnyà mu, mu yeru obu. Ọo ya bu onye vuchakpọo ọzo woru onwiya ye Kéreshi l'ẹka lẹ Eshiya. <sup>6</sup> Unu kelekwaru mu phọ Meri; onye jeru anyi ozi jeshia ya ike. <sup>7</sup> Unu ekelekwaphọ Anduronikosu yẹe Jiuniyasu; ndu mu l'ẹphe bu ndu Jiu lanu bya aburu ndu mu l'ẹphe shi tuko ọdu mkpọro. Ẹphe bu ndu kwatakpọoru ọdu onyemonye lẹ nsọ mẹ a -bya l'ẹka ndu-ishi-ozu ọ; tẹme ẹphe vuru mu ọzo buru ndu ke Kéreshi.

<sup>8</sup> Unu kelekwaphọ Ampuliyatosu; onye mu yeru obu l'ime Nnajiuphu. <sup>9</sup> Unu ekelekwaphọ Ubanosu; onye anyi l'iya tukuror ejeru Kéreshi ozi; mękwapho onye ono, mu yeru obu ono, bu Sutakis. <sup>10</sup> Unu kelekwaphọ Apelisu; onye gudewaa umere iya goshi lẹ ya pfu-shiru ike l'ekwekwe, o kweru ke Kéreshi. Unu ekelekwaphọ ndibe Arisutobulosu. <sup>11</sup> Unu kelekwaphọ Herodiyonu onye mu l'iya tukuror buru abubu. Unu ekelekwaphọ ndu bu l'ibe Nasisosu; ndu ọwaa Nnajiuphu l'ẹka.

<sup>12</sup> Unu kelekwaphọ Tirayifina yẹe Tirayifosa ndu ejeru Kéreshi ozi ejeshikpọo ya ike. Unu ekelekwaphọ onye mu yeru obu, bu Pesisu; onye jewaru Kéreshi ozi jeshikwaa ya phọ ike. <sup>13</sup> Unu kele Rufosu onye ono, gbaru iche l'ejeshi ozi ke Nnajiuphu ike ono. Unu ekele ne iya; onye ọhukwapho g'ọ buwaa ne nkemu. <sup>14</sup> Unu kelekwaru mu phọ Asinkiritosu; waa Fulęgonu;



waa Hemisu; waa Paturobasu; waa Hemasu; mękpowaro ụnwunna ọzo, ẹphe l'ẹphe tukuru nọdu l'ẹka ono. <sup>15</sup> Unu kele Fılologosu; waa Jiuliya; waa Niriyosu; waa nwune iya kẹ nwanyi; waa Olimpasu; mękpowaro iphe, bukotakpoo ndu-nsọ, ẹphe l'ẹphe nọ l'ẹka ono.

<sup>16</sup> Unu kelekwa nwibe unu ekele; nmata pẹ akpa, dọ nsọ. Ndu kẹ Kéreshi, nọ l'iphe, bukota Chiochi l'opfu ekelekwatakwapfo unu ekele.

### *Iphe, unu e-meje*

<sup>17</sup> Ụnwunna mu; mu arwọkwa unu arwọrwo sọ g'unu letakwa ẹnya m'ọbvụ ndu ono, anọduje eme g'ékwo dọ onoya; ndu egudeje ẹgube ono agbaghashi iphe, Chiochi kwetarọ l'ọ bọ ọkpobe-opfu. Iphe, ẹphe anọduje eme bẹ yẹ iphe ono, e ziru unu ono ta adagbajedu. Unu kpakwaru pẹ l'aphara. <sup>18</sup> Kẹle ndu eme ọdu iphe ono ta abukwa Nnajiuphu anyi, bọ Kéreshi bẹ ẹphe ejeru ozi; ọ kwa iphe, ẹkpiri iya dọ pẹ bẹ ẹphe eje ozi iya. Ẹphe eteje manọ l'opfu; gude ire mecha mecha edepushi ndu enwezidu egomunggo. <sup>19</sup> Ọle onyemonye tukuru maru g'unu emeberu iphe, ozi-oma ono pfuru. Ọ bọru iphe ono meru g'o gude ẹhu nọdu anọduje atso mu uto. Ọle ọ dọ mu g'a sọ g'unu gudeje mmamiphe majeru iphe, bọ iphe, dọ ree; sefuje ẹka l'iphe, adudu ree. <sup>20</sup> Chileke onye bọ iya bẹ nchi-adu-doo shi l'ẹka taa noekwa ọdu g'o to mee g'unu zopyashia Nsetanu l'okpa. Gẹ Nnajiuphu anyi, bọ Jizosu Kéreshi mekwaaru unu eze-iphe-oma.

21 Timoti, mu l'iya tukuru eje ozi-a; l'ekelekwapho unu. Lusiyosu; waa Jiasonu; me Sosipeta phe; ndu anyi l'ephe tukuru buru abubu l'ekelekwaro unu.

22 Mbedua, bu Teshiyosu, l'ede ekwo-ozia; bya aburu onye unu l'iya tugbaru nanu l'ime Nnajiuphu l'ekelekwapho unu ekele.

23 Gayosu-a, mu bu l'ibe iya-a; teme o buru l'ibe iya be Chiochi l'ophu edzukoje-a; l'ekelekwapho unu-o! Nokwapho ge Erasutosu; mbu onye owa-a, bu iya edobejeru oha okpoga phe-a; l'ekelekwapho unu yee nwanna anyi, bu Kwotosu.

24 Ge Nnajiuphu anyi, bu Jizosu Kereshi meeru unu g'unu hakota eze-iphe-oma. Nokwa go du.

*Aja Chileke ajaja, Polu gude  
kpochia ozi ishi*

25 G'anyi jaa Chileke ajaja; l'oo ya l'a-du ike mee g'unu pfuru pfushia ike l'ekwekwe, unu kweru nkiya. O buru ozi-oma ono, mu ezi ono be oogudeje eme g'unu pfushia ike ono; mbu ozi-oma ono, l'epfu ke Jizosu Kereshi onoya; bya egoshikwapho iphe ono, e shi domia edomi ono, a phuru l'ophulenyia eshi l'edenwede ono.

26 O buru iphe ono be o gbete nta-a bya emee g'a maru. Nta-a be okpobe-opfu ono shiwaa l'iphe, ndu mpfuchiru Chileke deru bahu g'ite; a numadzuru iya. Nta-a be Chileke ono adudu teke aa-su l'o shi; ophu o dudu teke aa-su l'o noo teke onoberu ono; ziru e woru okpobe-opfu ono mee; ohamoha mgburugburu madzuru iya; k'ophu eekwetadzuru meje iphe, o suru g'e mee. 27 G'e shi

Jizọsu Kéreshi l'ẹka jaa Chileke ajaja; mbu onye lanu ono, bu yebedua nwẹkiya bu Chileke; teme o buru iya nwẹkinyi iya nwe ke mmamiphe. G'a jaa ya jasụ ẹ tuutuutuu ẹ mịimiimii. Nokwa g'ọ dụ.

**Bayiburu Izii**  
**Izii: Bayiburu Izii Bible**

copyright © 2014 Wycliffe Bible Translators, Inc.

Language: (Izii)

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 21 Feb 2024 from source  
files dated 29 Jan 2022

c6885c7c-c550-5b8b-a4fe-4bd714af4f6d